

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI KHAMIS : 6 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 1, 11 HINGGA NO. 49)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 6 OGOS 2020 (KHAMIS)

SOALAN

Minta **MENTERI PENGAJIAN TINGGI** menyatakan apakah perancangan pihak PTPTN dalam membantu peminjam menstrukturkan bayaran balik pasca pandemik COVID-19 dalam langkah membantu meringankan beban kewangan mereka.

JAWAPAN

Tuan Yang di-Pertua,

Atas keprihatinan kerajaan untuk membantu peminjam PTPTN yang terkesan akibat pandemik COVID-19, YB Menteri Pengajian Tinggi semasa sesi penggulungan Perbahasan Titah Diraja pada 4 Ogos 2020 mengumumkan pelanjutan tempoh moratorium kepada semua peminjam PTPTN bermula daripada Oktober sehingga Disember 2020. Sebelum ini kerajaan juga telah memberi penangguhan bayaran balik selama enam (6) bulan mulai 19 Mac 2020 sehingga 30 September 2020. Kedua-dua penangguhan ini memanfaatkan 1.5 juta peminjam dengan anggaran kutipan bayaran balik yang ditangguhkan sebanyak RM1.125 billion.

Dalam usaha mengurangkan beban peminjam juga, PTPTN sentiasa terbuka untuk berunding bagi menstrukturkan semula bayaran balik pinjaman mereka. Selain itu, bagi kes-kes tertentu penangguhan bayaran balik boleh dipertimbangkan sehingga maksimum 24 bulan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE EMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADEN
[KINABATANGAN]**

TARIKH : 6 OGOS 2020 (KHAMIS)

SOALAN

Minta **MENTERI PERTANIAN DAN INDUSTRI MAKANAN** menyatakan apakah usaha-usaha yang sedang dan akan dibuat oleh Kementerian dalam membantu meningkatkan pendapatan golongan nelayan, petani dan penternak.

JAWAPAN

Yang di-Pertua,

1. Untuk makluman, pada tahun 2020 Kementerian Pertanian dan Industri Makanan telah menerima peruntukan sebanyak RM4.898 billion. Daripada jumlah tersebut, sejumlah RM1.284 billion diperuntukkan bagi tujuan projek dan program manakala RM3.533 billion diperuntukan bagi perbelanjaan mengurus Kementerian sementara baki adalah bagi pinjaman.

Nelayan

2. Bagi membantu golongan nelayan, peruntukan sejumlah RM124.7 juta di bawah peruntukan mengurus bagi:

- i. **Program Elaun Sara Hidup Nelayan (ESHN):** Bantuan secara tunai kepada nelayan pada kadar RM250.00 sebulan bagi mengurangkan kos sara hidup.
- ii. **Insentif Hasil Tangkapan Ikan (IHTI):** Bayaran 10 sen/kg bagi pemilik vesel zon A, B dan C yang mendaratkan ikan di jeti, pelabuhan dan kompleks LKIM.

3. Selain daripada itu, golongan nelayan/penternak ikan juga mempunyai kemudahan lain yang ditawarkan dalam membantu usaha meningkatkan pendapatan seperti:

- i. **Skim Pinjaman Dana Nelayan oleh Lembaga Kemajuan Ikan:** Kemudahan pinjaman tanpa faedah kepada nelayan bagi tujuan untuk meningkatkan daya tangkapan seperti peralatan GPS, enjin bot, echo sounder dan seumpamanya. Bagi tahun 2020, sejumlah RM6.0 telah juta diperuntukkan di bawah skim ini; dan
- ii. **Bantuan Sistem Penyampaian dan Khidmat Sokongan (SPeKS):** Meningkatkan pengeluaran akuakultur melalui

bantuan input benih, makanan dan peralatan bagi sangkar/kolam ternakan dengan kadar RM10 ribu sehingga maksimum RM200 ribu.

Petani

4. Manakala bagi golongan petani, Kementerian melalui Jabatan Pertanian menyediakan bantuan insentif meliputi input pertanian, pembangunan kawasan, pembinaan pusat pengumpulan dan pemprosesan serta stor melalui Bantuan Peningkatan Hasil Sayur dan Pembangunan Tanam Semula Buah-buahan. Kadar insentif kerajaan yang diperuntukkan sebanyak RM10,000.00/ha sehingga maksimum RM50,000.00/ha.

Penternak

5. Bagi sektor ternakan, Kementerian menyediakan bantuan insentif geran pepadanan pembiayaan bagi ternakan ruminan (Program Rintis PROPER) melalui bantuan induk pembiak ternakan ruminan (lembu, kambing, bebiri) dan Program Pembangunan Industri Tenusu Negara merangkumi aktiviti pembiakbakaan, tanaman makanan ternakan, transformasi usahawan tenusu dan peningkatan kualiti susu. Kerajaan juga sedang merancang pemberian bantuan berkaitan ternakan kepada golongan sasar B40 melalui Skim Rezeki Ternak.

Rentas Sektor

6. Selain itu, terdapat juga program/projek yang dirancang untuk membantu meningkatkan pendapatan dilaksanakan secara rentas sektor seperti:

- i. Program Rezeki Tani yang menumpukan kepada pelaksanaan projek-projek ekonomi merangkumi sub sektor tanaman, ternakan, perikanan, pemprosesan produk dan perniagaan tani bagi kumpulan sasar yang berpendapatan rendah dengan kadar bantuan maksimum sebanyak RM10,000.00;

- ii. Program Peningkatan Pendapatan Golongan B40 kepada pesawah, nelayan, penternak dan orang muda melalui projek tanaman kontan/tanaman singkat masa seperti cili, jagung manis, halia dan kunyit bagi menjana pendapatan sampingan dalam tempoh yang singkat seawal 3 – 6 bulan meliputi insentif secara in-kind yang diberikan kepada peserta dalam bentuk input pertanian, tenaga kerja, latihan dan khidmat nasihat teknikal serta elemen pemasaran hasil pertanian dengan kadar bantuan maksimum sebanyak RM25,000.00/ha; dan
- iii. Geran Agropreneur Muda (GAM) berbentuk barangan sehingga RM20,000.00 bagi setiap projek dan bantuan modal melalui Pakej Pembiayaan Khas Agrobank dan TEKUN Nasional sehingga RM200,000.00 bagi projek pengembangan.

Kementerian akan meneruskan usaha merangka projek/program untuk dimanfaatkan bagi memastikan kebajikan golongan sasaran di bawah Kementerian terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 6 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah kaedah yang akan diambil oleh Kementerian untuk membantu murid-murid yang tidak ada internet accessibility di rumah mereka menjalankan *e-learning*.

JAWAPAN

Tuan Yang di-Pertua,

Kementerian Pendidikan Malaysia (KPM) terus komited untuk memastikan semua murid di seluruh negara tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh PKP. KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid.

Kaedah *Home-based Learning* ini dilaksanakan melalui pelantar pembelajaran digital iaitu MOE-DL, yang kemudiannya dikenali sebagai Digital Education Learning Initiative Malaysia (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP, kuiz dan video permainan pembelajaran. Selain itu, ibu bapa juga boleh akses EduwebTV dan CikgooTube untuk membantu dalam pembelajaran anak mereka di rumah.

Untuk makluman Ahli yang Berhormat, KPM sentiasa berusaha untuk memastikan semua murid mendapat akses pembelajaran secara seragam. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan. Siaran dilaksanakan melalui saluran TV Okey dan saluran Tutor TV Astro 601 dan 603. Rancangan radio pendidikan juga dilaksanakan menerusi siaran Kedah FM, Terengganu FM dan Johor FM.

Di samping itu, terdapat juga guru yang melaksanakan Pengajaran dan Pembelajaran (PdP) melalui serahan bahan pembelajaran kepada murid. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa Guru (PIBG) dan kaunter pandu lalu di sekolah.

KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuklah pelaksanaan *Home-based Learning*.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HAJI WAN HASSAN
BIN MOHD RAMLI [DUNGUN]**

TARIKH : 6 OGOS 2020 [KHAMIS]

SOALAN

Minta **MENTERI TENAGA DAN SUMBER ASLI** menyatakan penjelasan rungutan rakyat terhadap isu bil TNB daripada Mac 2020 sehingga Mei 2020 dan apakah langkah membantu rakyat terhadap isu ini.

JAWAPAN

Datuk Yang di-Pertua,

1. Majoriti rungutan rakyat berkenaan bil elektrik bulan Mac hingga Mei 2020 adalah disebabkan pengguna tidak mendapat bil bacaan sebenar dalam tempoh tersebut. Bacaan sebenar tidak dapat dibuat kerana operasi bacaan meter elektrik secara fizikal telah dihentikan sepanjang tempoh Perintah Kawalan Pergerakan (PKP) bermula dari 20 Mac sehingga 18 Mei 2020.
2. Ini adalah selaras dengan prosedur Prosedur Operasi Standard (SOP) PKP yang ditetapkan oleh pihak Majlis Keselamatan Negara (MKN) demi menjaga kebajikan pembaca meter dan membendung penularan wabak COVID-19. Dalam hal ini, bacaan bil dibuat secara anggaran bagi tempoh Mac, April dan Mei 2020 yang menyebabkan bil elektrik bulan Jun kelihatan tinggi kerana penyelarasan dibuat bagi bil anggaran bulan Mac, April dan Mei di dalam bil bulan Jun. Langkah yang sama juga telah diambil oleh pihak utiliti lain di rantau ini seperti Singapura, Filipina, Thailand dan Indonesia.
3. Bagi membantu pengguna meringankan beban sara hidup rakyat dalam tempoh PKP, Kerajaan telah mengumumkan pakej-pakej diskaun bil elektrik seperti berikut:
 - (i) Pakej Rangsangan Ekonomi 2020 (PRE 2020) yang memberikan diskaun 15% bagi penggunaan elektrik untuk tempoh April hingga September 2020 kepada pengguna perdagangan daripada enam sektor perniagaan iaitu pengendali hotel, agensi pengembaraan dan pelancongan, kompleks membeli belah, pusat konvensyen, taman tema dan pejabat syarikat penerbangan tempatan. Selain itu, diskaun 2% juga diberikan kepada semua pengguna industri dan perdagangan selain daripada enam sektor perniagaan tersebut termasuk semua pengguna domestik seluruh Malaysia;
 - (ii) Pakej Rangsangan Ekonomi Prihatin Rakyat (PRIHATIN) adalah untuk menambah baik pakej PRE 2020 dengan pemberian diskaun

bil elektrik di antara 2% hingga 50% bagi penggunaan elektrik untuk tempoh April hingga September 2020 bagi pengguna domestik di Semenanjung sahaja; dan

- (iii) Bantuan Prihatin Elektrik (BPE) iaitu bil elektrik percuma sehingga RM77 sebulan untuk bulan April hingga Jun 2020 kepada semua pengguna domestik di Semenanjung yang melibatkan seramai 7.66 juta pengguna dan memperkenalkan diskaun tambahan sebanyak 8% kepada pengguna domestik dengan penggunaan 601 – 900 kWj sebulan;
- (iv) pelanjutan diskaun di bawah pakej PRIHATIN sehingga 31 Disember 2020 termasuk diskaun tambahan kepada pengguna dengan penggunaan 601 – 900 kWj sebulan; dan
- (v) penurunan surcaj kepada pengguna komersial dan industri sebanyak 2 sen/kWj di bawah semakan *Imbalance Cost Pass-Through* (ICPT) bagi tempoh 1 Julai hingga 31 Disember 2020. Ia memberikan tambahan diskaun kepada pengguna komersial dan industri di antara 3% hingga 5.7% yang melibatkan kos sebanyak RM626.67 juta.

4. Kesemua pakej dan pemberian diskaun ini melibatkan kos sebanyak RM3.2 bilion yang memberi manfaat kepada 7.6 juta pengguna bagi tempoh April hingga Disember 2020.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 6 OGOS 2020 (KHAMIS)

SOALAN

Minta **MENTERI PENGANGKUTAN** menyatakan sebab Kementerian untuk meneruskan projek pembinaan laluan monorel yang sebelum ini ditangguhkan selama 25 tahun dan adakah Kementerian sudah menjalankan penilaian dan kajian analisis biaya dan manfaat bagi projek ini.

JAWAPAN

Yang di-Pertua,

1. Untuk makluman Yang Berhormat, Infrastruktur monorel di Putrajaya telah mula dibina oleh Kerajaan pada tahun 2000, meliputi pembinaan terowong bawah tanah, jambatan dan juga stesen integrasi yang terletak di Putrajaya Sentral.
2. Mengambil kira infrastruktur-infrastruktur monorel yang telah dibina tersebut dan Putrajaya sebagai pusat pentadbiran Negara, Kementerian Pengangkutan merancang untuk menyediakan satu perkhidmatan pengangkutan awam yang menyeluruh dan turut merangkumi kawasan-kawasan sekitar Putrajaya seperti Cyberjaya, Bangi dan Kajang. Perancangan pengangkutan awam di kawasan ini juga adalah sebagai satu langkah untuk meningkatkan kesalinghubungan di antara mod pengangkutan sedia ada dan akan datang seperti MRT Laluan 2 (Sungai Buloh – Serdang – Putrajaya) dan *Kuala Lumpur - Singapore High Speed Rail* (stesen provisional).
3. Sehubungan itu, Kementerian Pengangkutan kini dalam proses menjalankan Kajian Pengangkutan Awam di Putrajaya, Cyberjaya, Bangi dan Kajang. Kajian ini bertujuan untuk mengenalpasti opsyen pengangkutan awam yang paling sesuai dan berdaya maju (*viable*) bagi koridor Putrajaya, Cyberjaya, Bangi dan Kajang, termasuk kesesuaian untuk menggunakan infrastruktur monorel sedia ada di Putrajaya. Selain itu, kajian ini juga akan mengkaji analisis biaya dan manfaat bagi setiap opsyen pengangkutan awam sebelum opsyen yang paling sesuai dicadangkan kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 06 OGOS 2020 (KHAMIS)

SOALAN

Minta **MENTERI PENDIDIKAN** menyatakan adakah rancangan untuk membina baru sekolah SK Sebayang yang terletak di kawasan Sebayang, Tanjong Manis dan telah diluluskan peruntukan oleh Kerajaan Barisan Nasional yang dahulu.

JAWAPAN

Tuan Yang di-Pertua,

Untuk makluman Ahli Yang Berhormat, pada 11 Disember 2019, Jabatan Pendidikan (JPN) Sarawak dan Pejabat Pendidikan Daerah (PPD) Daro telah membuat siasatan fizikal di SK Bayang. Berdasarkan siasatan, didapati dewan serbaguna sekolah telah mengalami kerosakan dan memerlukan penyelenggaraan.

Oleh itu, JPN telah menyediakan peruntukan untuk kerja-kerja penyelenggaraan dewan serbaguna sekolah berkenaan dengan kos sebanyak RM200,000. Perolehan projek akan dilaksanakan pada akhir Ogos 2020 dan dijangka akan siap pada bulan November 2020.

Berdasarkan penelitian KPM, bangunan sedia ada di SK Bayang masih dalam keadaan baik, selamat dan kondusif untuk digunakan. Sekiranya terdapat keperluan untuk membina bangunan baharu di masa hadapan, KPM akan mengambil langkah yang sewajarnya bagi tujuan tersebut.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN STEVEN CHONG SHIAU YOON
[TEBRAU]**

TARIKH : 06 OGOS 2020 (KHAMIS)

SOALAN

TUAN STEVEN CHOONG SHIAU YOON [TEBRAU] minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah Orang Kurang Upaya (OKU) dan ibu tunggal yang berdaftar dengan Jabatan Kebajikan Masyarakat (JKM) setakat ini. Daripada itu, berapakah mereka yang layak menerima bantuan secara 'one-off' sebanyak RM300.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) dan Jabatan Pembangunan Wanita (JPW) diberi tanggungjawab melaksanakan Bantuan Khas kepada Orang Kurang Upaya (OKU) dan Ibu Tunggal di bawah inisiatif Pelan Jana Semula Ekonomi Negara (PENJANA) yang telah diumumkan pada 5 Jun 2020 yang lalu.

Berdasarkan statistik Sistem Pengurusan Bantuan Kebajikan (*eBantuanJKM*) sehingga Julai 2020, seramai 190,000 OKU layak menerima Bantuan Khas Orang Kurang Upaya PENJANA. Kadar Bantuan Khas ini adalah sebanyak RM300 secara *one-off* (dengan izin).

Bagi melaksanakan tanggungjawab ini Kementerian Kewangan telah menyediakan peruntukan sebanyak RM57 juta. Bantuan Khas ini merupakan bantuan bersasar yang dikhususkan kepada penerima bantuan di bawah skim Bantuan Kewangan Bulanan OKU iaitu Elaun Pekerja Cacat (EPC), Bantuan Orang Kurang Upaya Tidak Bekerja (BTB) dan Bantuan Penjagaan OKU Terlantar/Pesakit Kronik Terlantar (BPT).

Sehingga 5 Ogos 2020, bagi fasa 1, seramai 185,770 orang (97%) telah menerima Bantuan Khas ini dengan jumlah peruntukan yang telah disalurkan sebanyak RM55.7 juta. JKJ kini sedang memproses bagi pembayaran fasa 2 kepada seramai 4,230 penerima baru bagi bulan Jun, Julai dan Ogos 2020 dengan peruntukan sebanyak RM1.3 juta. Bayaran akan diterima selewat-lewatnya pada 31 Ogos 2020.

Manakala jumlah ibu tunggal yang berdaftar dengan JKJ adalah 30,500 orang. Daripada jumlah tersebut, seramai 16,638 Ibu Tunggal telah diluluskan dalam fasa 1 untuk menerima Bantuan Khas Ibu Tunggal berupa bayaran secara *one-off* (dengan izin) sebanyak RM300 seorang. Jumlah selebihnya akan dipertimbangkan dalam fasa seterusnya.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO SERI HAJI IDRIS BIN JUSOH
[BESUT]**

TARIKH : 6 OGOS 2020 (KHAMIS)

SOALAN

DATO' SERI HAJI IDRIS BIN JUSOH [BESUT] minta **MENTERI KOMUNIKASI DAN MULTIMEDIA** menyatakan status pelaksanaan inisiatif Pelan Gentian Optik dan Kesalinghubungan Negara (NFCP) untuk menambah baik kelajuan perkhidmatan jalur lebar sedia ada, termasuk menyediakan sistem asas bagi rangkaian baharu 5G.

JAWAPAN

Tuan Yang di-Pertua,

1. Untuk makluman Ahli Yang Berhormat, inisiatif-inisiatif yang telah dirancang sebelum ini di bawah Pelan Gentian Optik dan Kesalinghubungan Negara (NFCP) seperti penyediaan perkhidmatan liputan jalur lebar mudah alih dan penaiktarafan rangkaian berasaskan tembaga kepada rangkaian gentian optik untuk pelanggan sedia ada di seluruh negara masih diteruskan.
2. Buat masa ini, di bawah inisiatif Pelan Gentian Optik dan Kesalinghubungan Negara 1 (NFCP 1), sebanyak 152 menara komunikasi baharu yang melibatkan 93 mukim di seluruh negara bagi penyediaan liputan perkhidmatan jalur lebar mudah alih 3G dan 4G, sedang dalam pelaksanaan bermula dari 15 Februari 2020. Daripada jumlah 152 menara ini, pembinaan menara komunikasi di 147 tapak dijangka akan siap secara berperingkat bermula pada suku pertama 2021, manakala selebihnya dijangka siap pada suku pertama 2022 memandangkan lokasinya yang agak jauh di pedalaman.
3. Selain dari itu, bermula bulan Mac 2020 yang lalu, pihak Suruhanjaya Komunikasi dan Multimedia Malaysia (SKMM) juga sedang giat melaksanakan inisiatif penaiktarafan rangkaian berasaskan tembaga kepada rangkaian gentian optik yang melibatkan sebanyak 933,724 pelanggan sedia ada di seluruh negara. Inisiatif yang dijalankan oleh Telekom Malaysia Berhad ini dijangka siap dalam tempoh 2 tahun ini. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.
4. Pada masa yang sama, Kementerian dan SKMM juga sedang mengadakan sesi perancangan bersama pihak industri dan pelbagai agensi Kerajaan untuk memantapkan kualiti dan liputan perkhidmatan menggunakan pelbagai teknologi. Perancangan ini akan menambahbaik pelan sedia ada di samping menyediakan rangkaian asas yang kukuh ke arah pelaksanaan perkhidmatan 5G.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN RAMKARPAL SINGH A/L
KARPAL SINGH [BUKIT GELUGOR]**

TARIKH : 6 OGOS 2020 (KHAMIS)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI KEWANGAN** menyatakan sama ada moratorium bayaran balik pinjaman institusi kewangan akan dilanjutkan selepas Oktober, 2020 dan sekiranya tidak, apakah langkah-langkah yang diambil oleh Kerajaan untuk membantu pengguna mengharungi tempoh pasca moratorium tersebut.

JAWAPAN

Tuan Yang Di-Pertua,

1. Penangguhan pembayaran balik pinjaman (moratorium) secara automatik selama enam bulan sehingga September 2020 adalah bertujuan membantu para peminjam individu dan perusahaan kecil dan sederhana (PKS) mendapat bantuan aliran tunai segera terutamanya ketika pelaksanaan Perintah Kawalan Pergerakan (PKP) yang telah memberi kesan langsung kepada kegiatan ekonomi.
2. Sehingga 20 Julai 2020, lebih 7.7 juta peminjam individu atau 93 peratus daripada kesemua peminjam telah mendapat manfaat daripada moratorium bayaran pinjaman yang bernilai RM38.3 bilion. Dalam tempoh yang sama, sejumlah 243,000 PKS atau 95 peratus daripada keseluruhan

peminjam PKS telah menerima manfaat daripada moratorium ini dengan nilai RM20.7 bilion.

3. Sejak pembukaan semula ekonomi secara berperingkat pada bulan Mei yang lalu dan kemudiannya dalam tempoh PKP Pemulihan, aktiviti ekonomi di seluruh negara dilihat semakin rancak. Kini, terdapat individu dan perniagaan yang mampu membayar semula pinjaman mereka. Jumlah peminjam individu yang meneruskan bayaran ansuran pinjaman dan tidak mengambil kemudahan moratorium meningkat daripada 331,000 peminjam pada bulan April, kepada 601,000 peminjam pada bulan Julai 2020. Manakala, bagi tempoh yang sama, jumlah peminjam PKS yang memilih untuk tidak mengambil kemudahan ini juga telah meningkat daripada 5,000 kepada 13,000 peminjam.

4. Bantuan susulan yang diberikan kepada peminjam selepas tamat tempoh moratorium perlu lebih bersasar bagi memastikan usaha lebih tertumpu kepada membantu peminjam yang betul-betul terjejas melalui pertolongan yang lebih wajar dan lebih memberi kesan.

5. Dalam hal ini, institusi perbankan termasuk institusi kewangan pembangunan seperti Bank Simpanan Nasional dan Agrobank di bawah kawal seliaan Bank Negara Malaysia (BNM) terlibat dalam pemberian lanjutan moratorium bersasar dan peruntukan fleksibiliti pembayaran balik seperti yang diumumkan oleh YAB Perdana Menteri pada 29 Julai 2020.

6. Sebagaimana yang diumumkan oleh YAB Perdana Menteri, Kerajaan telah bersetuju melaksanakan lanjutan moratorium bersasar dan peruntukan fleksibiliti pembayaran balik yang lebih berfokus khusus untuk golongan yang benar-benar memerlukan iaitu:

a) Individu yang kehilangan pekerjaan pada tahun 2020 dan masih lagi belum mendapat pekerjaan lain akan ditawarkan tempoh lanjutan moratorium pinjaman selama tiga bulan lagi oleh bank masing-masing.

b) Individu yang masih bekerja tetapi gaji mereka terjejas akibat COVID-19 akan ditawarkan pengurangan ansuran pinjaman yang sepadan dengan pengurangan gaji mereka, bergantung pada jenis pembiayaan. Institusi perbankan akan menawarkan tempoh fleksibiliti ini selama sekurang-kurangnya enam bulan. Institusi perbankan juga akan mempertimbangkan lanjutan pemberian fleksibiliti pada akhir tempoh tersebut, dengan mengambil kira gaji peminjam pada ketika itu.

7. Bagi pembiayaan sewa beli, peminjam yang terjejas akan ditawarkan jadual ansuran pembayaran yang disemak semula supaya selaras dengan Akta Sewa Beli 1967.

8. Selain itu, institusi perbankan juga komited untuk memberikan fleksibiliti pembayaran balik kepada individu lain dan semua peminjam PKS yang terjejas akibat COVID-19. Fleksibiliti yang ditawarkan oleh sesebuah bank akan mengambil kira keadaan spesifik setiap peminjam. Tawaran ini termasuk:

a. Membenarkan peminjam membayar bahagian faedah sahaja bagi sesuatu pinjaman dalam tempoh tertentu;

b. Memanjangkan tempoh keseluruhan pinjaman bagi mengurangkan ansuran bulanan; atau

c. Memberikan fleksibiliti lain sehingga kedudukan peminjam lebih stabil bagi menyambung pembayaran balik baki pinjaman.

9. Para peminjam dikehendaki memohon secara terus dengan bank masing-masing bagi mendapatkan fleksibiliti yang dinyatakan ini, mulai 7 Ogos 2020.

10. BNM akan memantau kemajuan pelaksanaan inisiatif yang dijalankan oleh institusi perbankan bagi membantu peminjam yang masih menghadapi kesulitan kewangan sementara. BNM juga akan terus

menumpukan usaha bagi memastikan sistem perbankan terus menjalankan fungsi perantaraannya dengan berkesan dalam menyokong pemulihan ekonomi.

Tuan Yang Di-Pertua,

11. Bagi meringankan beban rakyat, membantu perniagaan dan memulihkan semula ekonomi negara berikutan penularan pandemik COVID-19, Kerajaan telah bertindak proaktif dengan melaksanakan Pakej Rangsangan Ekonomi (PRE), Pakej Rangsangan Ekonomi Prihatin Rakyat (PRIHATIN), PRIHATIN Plus dan Pelan Jana Semula Ekonomi Negara (PENJANA) bernilai RM295 bilion.

12. Selain itu, Kerajaan sedang dalam proses penyediaan Pelan Jangka Panjang Pemulihan Ekonomi Pasca COVID-19 bagi memulihkan ekonomi dalam menghadapi norma baharu serta mempersiapkan ekonomi dalam mendepani lanskap baharu selepas berakhirnya COVID-19. Pelan ini, antara lain akan memberi tumpuan kepada penambahbaikan dalam pasaran buruh, reformasi institusi awam dan kerangka urus tadbir serta pelaksanaan pendigitalan dan Revolusi Perindustrian Keempat.

13. Kerajaan akan terus memperkemas dan melaksanakan pelbagai inisiatif untuk meningkatkan kualiti hidup rakyat, terus menyokong perniagaan dan merancakkan ekonomi melalui Belanjawan 2021 yang akan dibentangkan pada bulan November 2020. Selain itu, Rancangan Malaysia Kedua Belas, 2021 – 2025 (RMKe-12) yang akan dibentangkan pada awal tahun 2021 sedang dirangka dengan mengadakan libat urus bersama semua pihak berkepentingan bagi memastikan pertumbuhan jangka sederhana adalah berkualiti, inklusif dan mampan. RMKe-12 bermatlamat untuk membolehkan ekonomi dipulihkan sepenuhnya serta memastikan kesejahteraan rakyat dapat ditingkatkan dan kekayaan negara dapat dikongsi bersama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]**

TARIKH : 06 OGOS 2020 (KHAMIS)

SOALAN

Minta **MENTERI PENDIDIKAN** menyatakan perancangan dan pelan tindakan terperinci bagi menghadapi kemungkinan berlaku peningkatan kelompok tercicir dalam menguasai pendidikan pasca COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) komited dan berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid sepanjang tempoh Perintah Kawalan Pergerakan.

Namun, Kajian Kesiediaan Murid dalam Pembelajaran Secara dalam Talian oleh KPM mendapati bahawa sebahagian besar murid tidak memiliki peranti bersesuaian untuk mengikuti pembelajaran secara dalam talian. KPM menyedari bahawa terdapat kelemahan dalam pelaksanaan pengajaran dan pembelajaran melalui *Home-Based Learning* kerana murid tidak memiliki peranti bersesuaian dan akses terhad kepada internet. Selain itu, pengajaran dan pembelajaran secara dalam talian merupakan sesuatu yang baharu untuk kebanyakan guru, murid dan ibu bapa. Keadaan ini menyebabkan keberkesanan pengajaran dan pembelajaran secara dalam talian agak terhad berbanding kaedah secara bersemuka.

Untuk makluman Ahli Yang Berhormat, antara perkara utama yang dilaksanakan apabila sekolah dibuka semula adalah guru akan menilai tahap penguasaan murid. Seterusnya, guru akan mengambil tindakan sewajarnya bagi memastikan murid sekurang-kurangnya mencapai tahap penguasaan minimum dalam setiap mata pelajaran yang diikuti. KPM yakin apabila sekolah dibuka semula, murid dapat mengikuti pembelajaran secara bersemuka dengan lebih berkesan.

KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuklah pelaksanaan *Home-based Learning*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : DATO' IR AMIRUDDIN HAMZAH
(KUBANG PASU)**

TARIKH : 6 OGOS 2020 (KHAMIS)

SOALAN

Minta **MENTERI PENGANGKUTAN** menyatakan sama ada Kerajaan berhasrat untuk melaksanakan pemantauan terhadap kenderaan lebih muatan yang merosakkan jalan dan berbahaya kepada pengguna jalan yang lain seperti konsep "*weigh-in-motion*" di jalan-jalan yang telah dikenalpasti.

JAWAPAN

Yang di-Pertua,

1. Untuk makluman Yang Berhormat, isu berkaitan kenderaan perdagangan membawa lebih muatan adalah merupakan satu perkara yang sentiasa diberi perhatian oleh pihak Kementerian Pengangkutan dan Jabatan Pengangkutan Jalan (JPJ). Kenderaan lebih muatan ini bukan sahaja menyumbang kepada kerosakan infrastruktur jalan, tetapi yang lebih utama, membawa risiko kemalangan jalan raya yang tinggi kepada pengguna yang lain.

2. Pihak JPJ secara berterusan melaksanakan aktiviti-aktiviti penguatkuasaan ke atas peraturan had muatan kenderaan. Selain mengoperasikan 48 buah Stesen Penguatkuasa (atau stesen timbang) di seluruh negara, JPJ juga turut dibekalkan dengan 67 unit alat timbang mudah alih bagi tujuan menguatkuasakan peraturan berkaitan kenderaan lebih muatan. Hasilnya, untuk tempoh dua tahun bagi tahun 2018-2019, secara purata, sejumlah lebih daripada 65 ribu notis saman telah dikeluarkan dalam setahun, iaitu bersamaan dengan lebih daripada 5,400 ribu notis sebulan atau lebih daripada 180 notis saman dikeluarkan pada setiap hari.

3. Dalam hubungan ini, Kementerian menyedari bahawa aktiviti penguatkuasaan secara fizikal sahaja adalah tidak mencukupi bagi mengubah sikap dan minda pihak tidak bertanggungjawab untuk mematuhi peraturan tersebut. Perkara ini mengambil kira akan kekangan anggota yang dihadapi, keluasan kawasan operasi di seluruh negara dan kelicikan pihak-pihak yang tidak bertanggungjawab dalam meloloskan diri daripada jaringan penguatkuasaan termasuk dengan menggunakan khidmat-khidmat tonto.

4. Oleh yang demikian, Kementerian Pengangkutan dengan kerjasama Kementerian Kerja Raya, telah semenjak tahun 2016 lagi, mengadakan siri-siri perbincangan dan kajian ke arah menggunakan elemen teknologi tinggi dalam aspek penguatkuasaan peraturan had muatan kenderaan ini. Antara sistem yang telah dikenalpasti adalah

sistem dinamakan “Weigh-in Motion” atau WIM ini. Menerusi penggunaan sistem WIM, aktiviti penguatkuasaan peraturan berat serta had laju kenderaan boleh dilaksanakan secara automatik dan ditempatkan di lebih banyak lokasi di seluruh negara. Teknologi Weigh in Motion (WIM) akan mengukur kehadiran kenderaan yang sedang bergerak berasaskan kepada kekuatan *dynamic force* tayar kenderaan di lokasi yang ditentukan, dilengkapi penggunaan perisian yang turut menghitung masa, anggaran beban tayar, kelajuan, jarak gandar, kelas kenderaan mengikut susunan gandar dan parameter lain berkenaan kenderaan sebelum maklumat yang diterima dapat diproses, dipaparkan, disimpan, dan dianalisa termasuk bagi tujuan penguatkuasaan.

5. Berdasarkan kepada maklumat terkini daripada pihak Kementerian Kerja Raya (KKR), pihak KKR telah memohon peruntukan daripada pihak Unit Perancang Ekonomi (EPU) di dalam Rolling Plan 1 Rancangan Malaysia Ke-12 untuk melaksanakan sistem WIM. Sebagai permulaan, sistem WIM adalah dirancang untuk dipasang di 50 lokasi strategik yang telah dikenalpasti di seluruh negara.

6. Penggunaan sistem WIM bersama dengan aktiviti penguatkuasaan fizikal oleh JPJ akan berupaya meningkatkan keberkesanan pematuhan peraturan dan meluaskan liputan atau capaian aktiviti penguatkuasaan di seluruh negara. Ianya juga akhirnya akan berupaya menyumbang ke arah menjimatkan perbelanjaan kewangan Kerajaan untuk tempoh jangka masa panjang dalam skop penyelenggaraan infrastruktur jalan.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN NOR AZRINA BINTI SURIP
[MERBOK]**

TARIKH : 6 OGOS 2020 [KHAMIS]

SOALAN

YB PUAN NOR AZRINA BINTI SURIP [MERBOK] minta **MENTERI TENAGA DAN SUMBER ASLI** menyatakan dari manakah **sumber dana** untuk memberikan subsidi dengan memberikan diskaun penggunaan elektrik yang diumumkan dalam Pakej Rangsangan Ekonomi Prihatin Rakyat (PRIHATIN) mengikut kategori penggunaan bulanan dan apakah **kesan kepada Tenaga Nasional Berhad (TNB)** apabila penggunaan elektrik dalam segmen domestik, segmen komersial dan industri berubah sepanjang tempoh PKP dan PKPB.

JAWAPAN

Tuan Yang di-Pertua,

1. Sumber dana bagi menampung pemberian diskaun penggunaan elektrik yang diumumkan dalam Pakej Rangsangan Ekonomi 2020 (PRE2020), Prihatin Rakyat (PRIHATIN) dan Bantuan Prihatin Elektrik (BPE) adalah daripada dana Kumpulan Wang Industri Elektrik (KWIE), Kementerian Kewangan dan Tenaga Nasional Berhad. Jumlah keseluruhan kos pemberian diskaun ini ialah sebanyak RM2.62 bilion.
2. Sepanjang tempoh Perintah Kawalan Pergerakan (PKP) dan Perintah Kawalan Pergerakan Bersyarat (PKPB), terdapat penurunan penggunaan elektrik bagi sektor perdagangan (komersial) dan sektor perindustrian. Secara purata, sektor perdagangan mencatatkan penurunan penggunaan elektrik sebanyak 31% manakala sektor perindustrian mencatatkan penurunan sebanyak 47%.
3. Pengguna domestik pula menunjukkan peningkatan penggunaan elektrik secara purata 23% berbanding sebelum PKP apabila pengguna berada di rumah untuk jangka masa yang lebih panjang dan menggunakan lebih banyak peralatan elektrik daripada kebiasaan.
4. Memandangkan majoriti sektor industri dan komersial ditutup semasa PKP, terdapat perubahan penggunaan elektrik dalam tempoh PKP yang menyebabkan jualan elektrik oleh TNB menurun kepada RM3.4 bilion secara purata bagi bulan April hingga Jun berbanding RM3.8 bilion sebelum tempoh PKP.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK HAJAH AZIZAH BINTI DATUK
SERI PANGLIMA HAJI MUHD DUN
[BEAUFORT]**

TARIKH : 6 OGOS 2020 (KHAMIS)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI KOMUNIKASI DAN MULTIMEDIA** menyatakan adakah Kementerian bercadang untuk meningkatkan taraf liputan internet bagi kawasan-kawasan luar bandar khususnya di Sabah.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) telah dan sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi untuk membolehkan rakyat khususnya di kawasan luar bandar menikmati akses kepada perkhidmatan jalur lebar berkelajuan tinggi yang lebih menyeluruh.

2. Antara inisiatif-inisiatif penyediaan perkhidmatan jalur lebar yang sedang dilaksanakan di Sabah pada masa ini adalah seperti berikut:-

- a. pembinaan 65 menara baharu bagi penyediaan perkhidmatan jalur lebar mudah alih 4G. Daripada jumlah ini, sebanyak 55 menara komunikasi baharu yang sedang dibina adalah khusus untuk kawasan luar bandar. Pelaksanaan inisiatif ini dijangka siap dan beroperasi sepenuhnya secara berperingkat bermula suku pertama 2021; dan
- b. menaik taraf sebanyak lima (5) alat pemancar komunikasi di menara sedia ada di Sabah kepada perkhidmatan jalur lebar mudah alih 4G yang dijangka siap dan beroperasi sepenuhnya menjelang suku pertama 2021 termasuklah satu (1) alat pemancar sedang dinaiktaraf di kawasan luar bandar Sabah.

3. Pada masa yang sama, Kementerian dan SKMM juga sedang mengadakan sesi perancangan bersama pihak industri dan pelbagai agensi Kerajaan untuk memantapkan kualiti dan liputan perkhidmatan jalur lebar.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DATUK MOHD AZIS BIN JAMMAN
[SEPANGGAR]**

TARIKH : 6 OGOS 2020 (KHAMIS)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan perincian perbelanjaan yang digunakan untuk Pakej-Pakej Bantuan Prihatin Nasional semasa menangani COVID-19.

JAWAPAN

Tuan Yang di-Pertua,

Sebagai langkah memulihkan ekonomi yang terjejas akibat penularan wabak COVID-19, Kerajaan telah memperkenalkan Pakej Rangsangan Ekonomi Prihatin Rakyat (PRIHATIN) pada 27 Mac bernilai RM250 bilion, diikuti PRIHATIN PKS Tambahan pada 6 April bernilai RM10 bilion, dan Pelan Jana Semula Ekonomi Negara (PENJANA) pada 5 Jun bernilai RM35 bilion. Keseluruhannya, pakej-pakej rangsangan ekonomi tersebut bernilai RM295 bilion, dengan RM45 bilion daripadanya merupakan suntikan fiskal langsung.

Jumlah ini mewakili lebih kurang 17% daripada Keluaran Dalam Negara Kasar (KDNK), iaitu antara yang tertinggi di Asia Tenggara. Ini menunjukkan tahap keseriusan Kerajaan dalam memastikan rakyat dilindungi dan diperkasa, perniagaan disokong dan dilonjakkan, serta ekonomi diperkukuh dan dirangsang, dalam menghadapi cabaran semasa.

Prestasi pelaksanaan beberapa inisiatif utama yang berfokuskan rakyat, perniagaan dan ekonomi setakat 24 Julai 2020 adalah seperti berikut:

- i. Sebanyak RM62.8 bilion nilai moratorium pembayaran balik pinjaman telah dimanfaat oleh peminjam individu dan perniagaan;
- ii. Sebanyak RM11.14 bilion Bantuan Prihatin Nasional atau BPN telah dibayar kepada seramai 10.6 juta penerima dikalangan B40 dan M40;
- iii. Sebanyak RM8.01 bilion subsidi di bawah Program Subsidi Upah telah dibayar kepada 319 ribu majikan untuk mengekalkan sebanyak 2.53 juta pekerja;
- iv. Sebanyak RM8.9 bilion pinjaman di bawah Kemudahan Bantuan Khas atau *Special Relief Fund* (SRF) telah diluluskan oleh bank-bank tempatan dan disetuju terima oleh lebih kurang 20 ribu PKS;

- v. Sebanyak RM4 bilion projek-projek kecil bagi kontraktor kelas G1 hingga G4 seluruh negara sedang dalam pelaksanaan;
- vi. Sebanyak RM1.63 bilion telah dibayar kepada 545,000 PKS mikro di bawah inisiatif Geran Khas Prihatin yang merupakan bayaran tunai secara *one-off* bernilai RM3,000; dan
- vii. Sebanyak RM459 juta pinjaman mudah PKS mikro melalui TEKUN dan Bank Simpanan Nasional telah disalurkan kepada seramai 32.2 ribu usahawan.

Tuan Yang di-Pertua,

Pelaksanaan inisiatif-inisiatif di bawah PRIHATIN dan PENJANA di pantau dengan rapat oleh Unit Pelaksanaan dan Koordinasi Stimulus Ekonomi Antara Agensi Nasional (LAKSANA), Kementerian Kewangan. Unit LAKSANA membuat pelaporan prestasi pelaksanaan secara mingguan kepada Majlis Tindakan Ekonomi (EAC) yang dipengerusikan oleh YAB Perdana Menteri selain YB Menteri Kewangan turut membuat Laporan LAKSANA mingguan secara FB live atau siaran media yang boleh dituruti rakyat bagi mendapatkan perkembangan terkini PRIHATIN dan PENJANA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 6 OGOS 2020 [KHAMIS]

SOALAN

Minta **MENTERI PENGAJIAN TINGGI** menyatakan langkah-langkah yang diambil oleh pihak Kementerian untuk menangani lambakan graduan menganggur akibat sektor pekerjaan yang terjejas oleh wabak pandemik COVID-19.

JAWAPAN

Tuan Yang di-Pertua,

Dalam memastikan kebolehpasaran graduan ditingkatkan terutamanya selepas impak pandemik COVID-19, dua strategi telah digariskan iaitu pemantapan program *reskilling* dan *upskilling*; serta pemerkasaan agenda kebolehpasaran graduan. Di bawah strategi pertama, sebagai nilai tambah graduan akan didedahkan dengan pengetahuan baharu dan diberikan persijilan tambahan untuk meningkatkan kadar kebolehpasaran mereka. Melalui program *place and train* pula graduan akan ditempatkan di syarikat-syarikat tertentu untuk didedahkan dengan pengetahuan serta kemahiran sebelum mereka diambil bekerja. Di bawah strategi ini juga pihak kementerian melaksanakan inisiatif padanan pekerjaan melalui kolaborasi dengan rakan-rakan strategik kepada graduan yang masih belum bekerja.

Dalam usaha pemerkasaan agenda kebolehpasaran graduan, pihak kementerian telah menekankan agar program yang menjadi fokus dan mendapat permintaan daripada industri diberi keutamaan untuk ditawarkan oleh Institusi Pengajian Tinggi (IPT).

Selain itu, tumpuan turut diberikan oleh Kementerian untuk meningkatkan penerapan nilai keusahawanan kepada pelajar bagi menggalakkan graduan bekerja sendiri dan mampu berdaya tahan dalam jangka masa panjang. Melalui pelaksanaan inisiatif *Job Creator Framework* di bawah lonjakan 1, Pelan Pembangunan Pendidikan Malaysia 2015-2025 bagi Pendidikan Tinggi, pelajar diterapkan nilai dan kemahiran keusahawanan untuk menganjakkan minda mereka daripada hanya bermatlamat sebagai pencari kerja (*job seeker*) kepada pencipta kerja (*job creator*).

Di bawah strategi ini juga kapasiti dan keupayaan tenaga pengajar ditingkatkan agar mereka berupaya menyampaikan pengajaran dan memberikan bimbingan yang berkualiti kepada pelajar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 6 OGOS 2020 (KHAMIS)

SOALAN

Minta MENTERI PERTANIAN DAN INDUSTRI MAKANAN menyatakan adakah Kementerian bercadang untuk memberi kebebasan kepada pesawah memilih input penanaman padi mereka.

JAWAPAN

Tuan Yang Dipertua,

1. Untuk makluman Ahli Yang Berhormat, Kerajaan, melalui Kementerian Pertanian dan Industri Makanan (MAFI) ada menyediakan pelbagai subsidi dan insentif input pertanian kepada pesawah. Antaranya adalah subsidi Racun Makhluk Perosak di bawah Skim Insentif Pengeluaran Padi di mana pesawah diberikan kupon bernilai RM200 setiap musim penanaman untuk memilih sendiri racun yang bertepatan mengikut kesesuaian kawasan penanaman padi mereka mengikut keperluan masing-masing. Pembelian racun melalui penggunaan kupon adalah berdasarkan senarai racun yang didaftarkan oleh MAFI yang dikemaskini dari semasa ke semasa. Buat masa ini, senarai daftar ini merangkumi 72 jenis racun serangga, rumpai, kulat, tikus, siput serta lain-lain.

2. Manakala bagi input penanaman padi yang lain seperti baja dan pengapuran, Kementerian masih belum mempunyai sebarang perancangan untuk menyediakan senarai daftar produk-produk berkenaan. Namun, Kementerian sedang giat melaksanakan program *Site-Specific Nutrient Management* (SSNM) yang bertujuan memenuhi keperluan nutrien tanaman padi menerusi pengesyoran dan formulasi baja mengikut lokasi khusus.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DR. LEE BOON CHYE
[GOPENG]**

TARIKH : 06 OGOS 2020 (KHAMIS)

SOALAN

DR. LEE BOON CHYE [GOPENG] minta **MENTERI KEWANGAN** menyatakan bilangan pekerja yang penerima wang tunai serta jumlah wang yang disalurkan untuk mengatasi impak ekonomi pandemik COVID-19.

JAWAPAN

Tuan Yang di-Pertua,

Di bawah pakej-pakej rangsangan ekonomi yang telah diumumkan oleh Kerajaan, beberapa bantuan secara langsung telah disediakan kepada golongan pekerja, iaitu melalui pemberian tunai bertujuan meringankan beban kewangan mahupun mengekalkan pekerjaan. Sehingga 24 Julai 2020, pelaksanaan bantuan-bantuan berkenaan adalah seperti berikut:

- i. Sebanyak RM1.25 bilion telah dibayar kepada seramai 2.5 juta penerima Bantuan Penjawat Awam dan Pesara berupa bayaran tunai RM500 secara *one-off*;
- ii. Sebanyak RM207.8 juta telah dibayar kepada lebih kurang 236 ribu pekerja di bawah Program Pengekalan Pekerjaan;
- iii. Sebanyak RM22.3 juta bantuan tunai RM600 secara *one-off* telah dibayar kepada seramai 37.2 ribu pemandu teksi dan pemandu pelancong;
- iv. Sebanyak RM34.2 juta bantuan tunai RM500 secara *one-off* telah dibayar kepada seramai 68.3 ribu pemandu *e-hailing*;
- v. Sebanyak RM1.86 juta bantuan tunai RM600 secara *one-off* telah dibayar kepada seramai 3.1 ribu pemandu bas pelancong; dan
- vi. Sebanyak RM600 bantuan tunai secara *one-off* akan dibayar kepada seramai lebih kurang 30 ribu pemandu bas sekolah bermula 14 Ogos 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN LARRY SOON @
LARRY SNG WEI SHIEN [JULAU]**

TARIKH : 6 OGOS 2020 (KHAMIS)

SOALAN

TUAN LARRY SOON@LARRY SNG WEI SHIEN [JULAU] minta **MENTERI KEWANGAN** menyatakan adakah Kerajaan bertindak menstrukturkan semula dana yang telah diperuntukkan kepada Kementerian-kementerian pada tahun ini berikutan penularan wabak COVID-19. Jika ya, nyatakan jumlah dana yang distrukturkan semula untuk setiap Kementerian-kementerian yang terlibat.

JAWAPAN

Tuan Yang di-Pertua,

Untuk makluman Ahli Yang Berhormat, susulan penularan wabak COVID-19 yang melanda dunia pada ketika ini, Belanjawan 2020 perlu dikaji semula untuk mengambil kira kedudukan ekonomi dan keutamaan dasar semasa. Sehubungan itu, Kementerian Kewangan telahpun selesai melaksanakan tindakan penyesuaian Belanjawan 2020 pada 15 Julai 2020 dengan mengambil kira prestasi perbelanjaan kementerian yang perlahan terutamanya dalam tempoh Perintah Kawalan Pergerakan (PKP) dari bulan Mac hingga Jun 2020. Penjimatan ini akan diagihkan semula untuk menampung ruang fiskal serta inisiatif yang telah diumumkan dalam Pakej Rangsangan Ekonomi (PRIHATIN) dan Pelan Jana Semula Ekonomi Negara (PENJANA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 6 OGOS 2020 (KHAMIS)

SOALAN

Minta **MENTERI PENDIDIKAN** menyatakan sama ada KPM telah menerima laporan Pasukan Petugas Dasar Sijil Peperiksaan Bersepadu (PPDUEC) berhubung peperiksaan itu. Sekiranya tidak, bila Menteri Pendidikan akan berjumpa dengan PPDUEC

JAWAPAN

Tuan Yang di-Pertua,

Kementerian Pendidikan Malaysia (KPM) telah menubuhkan Pasukan Petugas Dasar *Unified Examination Certificate* (PPDUEC) pada 29 Ogos 2018 untuk mengkaji isu pengiktirafan sijil UEC sebagai syarat am kelayakan untuk memasuki institusi pengajian tinggi awam (IPTA). Pelantikan tiga orang ahli PPDUEC telah dibuat oleh YB Menteri Pendidikan pada ketika itu dan mula menjalankan tugas mulai 29 November 2018.

Berdasarkan Terma Rujukan, PPDUEC diberi tempoh tiga hingga enam bulan untuk mengemukakan laporan kajian kepada KPM. Walaupun tempoh kajian telah dilanjutkan sehingga 16 bulan, dengan enam kali pelanjutan tempoh kajian, iaitu sehingga Februari 2020, PPDUEC masih belum menyerahkan laporan kajian berkenaan. Memandangkan tempoh kajian tidak dilanjutkan dan telah tamat pada 29 Februari 2020, maka keanggotaan PPDUEC juga tamat secara automatik pada tarikh yang sama, iaitu 29 Februari 2020.

Untuk makluman ahli Yang Berhormat, sehingga kini KPM belum menerima sebarang laporan awal, draf laporan atau laporan lengkap daripada PPDUEC, sepertimana yang ditetapkan semasa pelantikan dibuat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 6 OGOS 2020 (KHAMIS)

SOALAN

TUAN SIM TZE TZIN [BAYAN BARU] minta **MENTERI PERTANIAN DAN INDUSTRI MAKANAN** menyatakan jumlah peruntukan pinjaman faedah rendah Agrofood dalam pakej rangsangan 1 (27 Februari 2020), pakej rangsangan 2 (27 Mac 2020) dan pakej rangsangan 3 (5 Jun 2020). Apakah syarat-syarat meminjam dan nyatakan sebab-sebab sesetengah pengusaha mengadu tabung sudah kehabisan.

JAWAPAN

Yang Dipertua,

1. Di bawah Pakej Rangsangan, Bank Negara Malaysia (BNM) telah menyediakan Kemudahan Agromakanan (*Agrofood Facility* – AF) sejumlah RM1 bilion kepada perusahaan kecil dan sederhana (PKS) dalam Sektor Agromakanan. Pembiayaan ini bertujuan untuk meningkatkan pengeluaran agromakanan bagi keperluan dalam negara dan juga untuk tujuan eksport.
2. Peruntukan ini boleh dipohon oleh PKS melalui mana-mana institusi kewangan termasuk Bank Pertanian Malaysia Berhad (Agrobank), tertakluk kepada ketersediaan dana oleh BNM. Sehingga pertengahan Julai 2020, Agrobank telah menerima dana Kemudahan Agromakanan ini daripada BNM berjumlah hampir RM200 juta.

3. Syarat-syarat dikenakan oleh Agrobank adalah seperti mana syarat-syarat yang telah ditetapkan oleh BNM. Antara syarat pembiayaan tersebut adalah seperti berikut:

- (i) terbuka kepada perusahaan kecil dan sederhana (PKS) sektor agromakanan;
- (ii) had maksimum pembiayaan yang disediakan ialah sebanyak RM5 juta bagi setiap PKS dengan kadar 3.75%;
- (iii) tempoh maksimum pembiayaan adalah selama lapan (8) tahun;
- (iv) fokus utama adalah bagi perbelanjaan modal dan operasi serta pembangunan projek agromakanan; dan
- (v) pembiayaan ini boleh dipohon oleh PKS Malaysia yang 51% sahamnya dimiliki oleh warganegara Malaysia.

4. Di bawah Pelan Jana Semula Ekonomi Negara (PENJANA) yang telah diumumkan pada 5 Jun 2020, Kementerian Pertanian dan Industri Makanan telah menerima peruntukan Dana Pembiayaan Mikro Kredit Agromakanan sejumlah RM350 juta bertujuan untuk memastikan kelangsungan sektor pertanian dan makanan yang terjejas akibat Pandemik Covid-19. Pinjaman mikro ini ditawarkan menerusi Agrobank pada kadar 3.5%.

5. Selain daripada perkhidmatan pembiayaan, Agrobank turut memberikan latihan keusahawanan serta khidmat nasihat perniagaan kepada usahawan yang berminat dalam Sektor Agromakanan.

6. Berkaitan dengan aduan bahawa dana Kemudahan Agromakanan sudah kehabisan, Agrobank tidak pernah mengeluarkan sebarang kenyataan lisan atau bertulis yang menyatakan bahawa peruntukan dana ini telah kehabisan, malah Agrobank mengalu-alukan penerimaan permohonan-permohonan baharu.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 6 OGOS 2020 [KHAMIS]

SOALAN

Minta **MENTERI TENAGA DAN SUMBER ASLI** menyatakan **jumlah aduan** berkaitan peningkatan bil elektrik selepas menjalankan semula bacaan meter selepas Perintah Kawalan Pergerakan (PKP). Apakah **punca bil elektrik terlalu tinggi** dan **bagaimana Kementerian menjelaskan kaedah pengiraan** penggunaan elektrik kepada rakyat.

JAWAPAN

Tuan Yang di-Pertua,

1. Sebanyak 67,576 pertanyaan dan aduan berkaitan peningkatan bil elektrik telah diterima bagi tempoh Mei dan Jun 2020 oleh pihak Tenaga Nasional Berhad (TNB) selepas menjalankan semula bacaan meter bermula 15 Mei 2020 yang dihentikan bermula pada 20 Mac 2020.
2. Selain itu, sejumlah 3,551 aduan terhadap TNB bagi tempoh yang sama juga telah diterima oleh Suruhanjaya Tenaga berhubung peningkatan bil elektrik semasa tempoh Perintah Kawalan Pergerakan (PKP). Pertanyaan dan aduan yang dikemukakan oleh pengguna ini adalah untuk mendapatkan penjelasan lanjut mengenai pengiraan bil elektrik mereka semasa tempoh PKP.
3. Terdapat beberapa faktor yang menyumbang kepada peningkatan bil elektrik di kalangan pengguna domestik sepanjang tempoh PKP. Antaranya adalah seperti berikut:
 - (i) penggunaan elektrik di kalangan pengguna domestik sepanjang tempoh PKP telah meningkat di antara 20 hingga 50%. Keadaan ini berlaku kerana rakyat telah mematuhi perintah Kerajaan untuk berada di rumah masing-masing dan tidak keluar rumah sepanjang tempoh PKP kecuali pekerja-pekerja dalam sektor-sektor yang menyediakan perkhidmatan penting kepada rakyat; dan
 - (ii) operasi bacaan meter elektrik secara fizikal telah dihentikan sepanjang tempoh PKP iaitu bagi tempoh 20 Mac 2020 sehingga 18 Mei 2020. Bacaan bil dibuat secara anggaran bagi tempoh Mac, April dan Mei 2020 yang menyebabkan bil elektrik bulan Jun kelihatan tinggi kerana penyelarasan dibuat bagi bil anggaran bulan Mac, April dan Mei di dalam bil bulan Jun.

4. Memang tidak dinafikan bahawa pembacaan bil secara anggaran ini telah menimbulkan kekeliruan di kalangan pengguna memandangkan ini merupakan kali pertama TNB melaksanakan pengebilan secara anggaran untuk tempoh 3 bulan berturut-turut. Tambahan pula, kaedah pengiraan ini agak sukar difahami oleh sebahagian besar rakyat yang menyebabkan timbulnya ketidakpuasan hati dan seterusnya menyebabkan isu peningkatan bil secara mendadak menjadi tular di media sosial. Walau bagaimanapun, saya ingin memaklumkan kepada Dewan Yang Mulia ini bahawa kaedah pengiraan yang diguna pakai oleh TNB telah disahkan dan diluluskan oleh Suruhanjaya Tenaga sebagai badan kawal selia industri bekalan elektrik negara. Kaedah yang sama juga diguna pakai oleh utiliti negara lain yang telah menghentikan bacaan bil secara fizikal dalam menangani penularan wabak COVID-19.

5. Bagi membantu pengguna memahami kaedah pengiraan bil elektrik ini, pihak Kerajaan bersama-sama Suruhanjaya Tenaga dan TNB telah memberi penjelasan melalui pelbagai kaedah menggunakan saluran media elektronik, media cetak dan media sosial. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 6 OGOS 2020 (KHAMIS)

SOALAN

Minta **MENTERI PENGANGKUTAN** menyatakan apakah perkembangan terbaru Projek Rel Pantai Timur (ECRL) Seksyen C dari Temerloh ke Pelabuhan Kelang, sama ada skim keretapi Seksyen C tersebut telah mendapat kelulusan muktamad daripada Kementerian di bawah peruntukan Seksyen 84 Akta Pengangkutan Awam Darat dan apakah jajaran ECRL Seksyen C akan berubah.

JAWAPAN

Yang di-Pertua,

1. Untuk makluman Yang Berhormat, Projek ECRL telah dikenalpasti sebagai salah satu projek mega yang harus disegerakan pelaksanaannya melalui pakej stimulus yang diumumkan YAB Perdana Menteri pada 27 Mac 2020. Kegiatan ekonomi yang dijana oleh projek ECRL diharapkan dapat merangsang kegiatan ekonomi dan membuka peluang pekerjaan baru untuk penduduk di Pantai Timur yang terkesan daripada penularan wabak COVID-19.

2. Jajaran projek ECRL ini telah dibahagikan kepada tiga bahagian iaitu Seksyen A (Jajaran dari Kota Bharu – Dungun), Seksyen B (Jajaran dari Dungun – Mentakab) dan Seksyen C (Jajaran dari Mentakab – Pelabuhan Klang). Pihak Malaysia Rail Link Sdn. Bhd. (MRL) sebuah anak syarikat milik penuh Menteri Kewangan Diperbadankan dan sebagai pemilik projek ECRL telah mendapat kelulusan muktamad Skim Keretapi bagi Seksyen A dan Seksyen B. Selain itu, kelulusan Kajian Impak Alam Sekitar (EIA) dan Kajian Impak Warisan (HIA) telah mendapat kelulusan daripada pihak berkuasa yang berkaitan. Laporan Kajian Impak Sosial (SIA) juga telah siap dan diserahkan untuk kelulusan bagi kedua-dua seksyen ini.

3. Bagi Seksyen C (Jajaran Mentakab – Pelabuhan Klang), Kerajaan sedang dalam proses memuktamadkan jajaran ini. Proses ini perlu dijalankan dengan Kerajaan mengambilkira beberapa faktor penting seperti viabiliti projek, kesalinghubungan rel dan kewangan sebelum kelulusan diberikan bagi jajaran ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

TARIKH : 06 OGOS 2020 (KHAMIS)

SOALAN

Minta **MENTERI PENDIDIKAN** menyatakan menerangkan sekiranya kontrak 1Bestarinet akan disambung walaupun ianya telah menyebabkan kerugian beratusan juta Ringgit Malaysia ke atas Kementerian Pendidikan.

JAWAPAN

Tuan Yang di-Pertua,

Untuk makluman Ahli Yang Berhormat, kontrak 1BestariNet Fasa 2 antara Kerajaan dan Syarikat YTLN telah berakhir pada 30 Jun 2019 dan Kementerian Pendidikan Malaysia (KPM) tidak bercadang untuk menyambung kontrak 1BestariNet. Pada masa ini, KPM telah menyediakan talian internet melalui Pakej Interim Perkhidmatan Internet dengan tiga (3) penyedia perkhidmatan internet iaitu Telekom Malaysia Berhad, Celcom Mobile Sdn. Bhd. dan Maxis Broadband Sdn. Bhd.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 6 OGOS 2020 (KHAMIS)

SOALAN

Minta **MENTERI PENDIDIKAN** menyatakan apabila Kerajaan melaksanakan Batalion 10 PGA di tapak seluas 321 ekar di Sg. Paoh, Sarikei yang akan meningkatkan jumlah pelajar yang sangat besar di SK Sg. Paoh dan SMK Sg. Paoh, adakah Kementerian akan mengambil pertimbangan terhadap pembangunan sekolah-sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengambil maklum mengenai kelulusan kerajaan bagi projek pembinaan Kem Batalion 10 Pasukan Gerakan Am (PGA) Sibu di Sungai Paoh, Sarikei. Projek ini turut melibatkan pembinaan kuarters kediaman bagi menempatkan keluarga anggota PGA.

Berdasarkan lokasi tapak projek, pembinaan kem ini adalah berhampiran dengan SMK Sungai Paoh dan SK Sungai Paoh, iaitu terletak lebih kurang satu kilometer daripada sekolah. Keadaan ini akan memberi kesan kepada sekolah apabila kem berkenaan siap dan mula diduduki oleh anggota PGA serta keluarga, termasuk anak-anak yang perlu dihantar ke sekolah berhampiran. Justeru, Jabatan Pendidikan Negeri Sarawak akan melaksanakan kajian keperluan bagi mendapatkan unjuran murid yang akan bersekolah apabila Kem Batalion 10 PGA mula beroperasi kelak.

Berdasarkan unjuran yang telah dibuat sebelum ini KPM mendapati terdapat keperluan untuk membina bangunan tambahan di SMK Sungai Paoh bagi menampung pertambahan murid. Sehubungan itu, KPM telah mengemukakan permohonan mengenai cadangan pembinaan tambahan bangunan di SMK Sungai Paoh dalam *Rolling Plan* yang pertama (1), Rancangan Malaysia Ke-12 (RMKe-12). Skop projek yang dicadangkan adalah pembinaan tambahan bangunan bilik darjah, pembinaan gantian asrama dan kemudahan-kemudahan lain. Pelaksanaan projek ini adalah tertakluk kepada kedudukan kewangan kerajaan.

Bagi tujuan kerja-kerja naik taraf, baik pulih dan penyelenggaraan sekolah, sejumlah RM1.285 juta telah disalurkan kepada SMK Sungai Paoh untuk tempoh lima tahun, antara tahun 2016 hingga tahun 2020. Bagi tahun 2020, KPM telah menyalurkan peruntukan berjumlah RM704,000 termasuk RM400,000 di bawah Pakej Rangsangan Ekonomi 2020 kepada sekolah ini.

Bagi SK Sungai Paoh pula, Jabatan Pendidikan Negeri Sarawak pada November 2019 telah mengesahkan bahawa bangunan akademik dan pentadbiran di SK Sungai Paoh adalah bangunan daif yang tidak selamat digunakan. Berdasarkan analisis skor gred impak, bangunan ini berada pada tahap 6. Sehubungan ini, KPM perlu mendapatkan pengesahan teknikal daripada Jabatan Kerja Raya Sarawak bagi mengenal pasti sama ada bangunan daif tersebut boleh dibaiki melalui penyelenggaraan atau perlu digantikan dengan bangunan baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 06 OGOS 2020 (KHAMIS)

SOALAN

Minta **MENTERI PENDIDIKAN** menyatakan tentang impak pembelajaran atas talian untuk para pelajar :-

- (a) apakah maklum balas pelajar dan cikgu dalam pelaksanaan kelas atas talian. Adakah kelas dijalankan dengan efektif dan adakah cikgu-cikgu dapat mengawasi prestasi pelajar; dan
- (b) apakah langkah yang boleh diambil oleh Kementerian untuk membantu golongan pelajar yang tidak mampu menghadiri kelas atas talian.

JAWAPAN

Tuan Yang di-Pertua,

Kementerian Pendidikan Malaysia (KPM) komited dan berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid sepanjang tempoh Perintah Kawalan Pergerakan.

Namun, Kajian Kesediaan Murid dalam Pembelajaran Secara dalam Talian oleh KPM mendapati bahawa sebahagian besar murid tidak memiliki peranti bersesuaian untuk mengikuti pembelajaran secara dalam talian. KPM menyedari bahawa terdapat kelemahan dalam pelaksanaan pengajaran dan pembelajaran melalui *Home-Based Learning* kerana murid tidak memiliki peranti bersesuaian dan akses terhad kepada internet. Selain itu, pengajaran dan pembelajaran secara dalam talian merupakan sesuatu yang baharu untuk kebanyakan guru, murid dan ibu bapa. Keadaan ini menyebabkan keberkesanan pengajaran dan pembelajaran secara dalam talian agak terhad berbanding kaedah secara bersemuka.

Sebagai sebahagian daripada pentaksiran dalam bilik darjah, guru telah berusaha melaksanakan penilaian prestasi murid secara dalam talian. Ini adalah sesuatu yang mencabar kerana pembelajaran tidak berlaku secara menyeluruh serta seragam kepada semua murid dan guru tidak dapat menilai murid secara bersemuka. KPM menghargai segala usaha guru untuk melaksanakan *Home-Based Learning* bagi memastikan pengajaran dan pembelajaran murid diteruskan walaupun dalam keadaan yang mencabar.

Untuk makluman Ahli yang Berhormat, antara perkara utama yang dilaksanakan apabila sekolah dibuka semula adalah, guru akan menilai tahap penguasaan murid. Seterusnya, guru akan mengambil tindakan sewajarnya bagi memastikan murid sekurang-kurangnya mencapai tahap penguasaan minimum dalam setiap mata pelajaran yang diikuti.

Untuk makluman Ahli yang Berhormat, KPM sentiasa berusaha untuk memastikan semua murid mendapat akses pembelajaran secara seragam. Bagi membantu kumpulan murid yang tidak mempunyai akses kepada talian internet dan alat peranti yang sesuai untuk pembelajaran secara dalam talian, *Home-based Learning* turut dilaksanakan melalui siaran TV Pendidikan. Siaran dilaksanakan melalui saluran TV Okey dan saluran Tutor TV Astro 601 dan 603. Rancangan radio pendidikan juga dilaksanakan menerusi siaran Kedah FM, Terengganu FM dan Johor FM.

Di samping itu, terdapat juga guru yang melaksanakan Pengajaran dan Pembelajaran (PdP) melalui serahan bahan pembelajaran kepada murid. Serahan bahan ini dibuat melalui pelbagai kaedah seperti perkhidmatan pos, bantuan penghantaran oleh Persatuan Ibu Bapa Guru (PIBG) dan kaunter pandu lalu di sekolah.

KPM akan sentiasa berusaha untuk meningkatkan lagi keberkesanan kaedah *Home-based Learning* ini dari semasa ke semasa. Buat masa ini, KPM sedang merangka strategi pelaksanaan yang komprehensif dalam memperkasa pendidikan digital, termasuklah pelaksanaan *Home-based Learning*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN WONG HON WAI
[BUKIT BENDERA]**

TARIKH : 6 OGOS 2020 (KHAMIS)

SOALAN

TUAN WONG HON WAI [BUKIT BENDERA] minta **MENTERI KEWANGAN** menyatakan statistik permohonan serta kelulusan / kegagalan permohonan untuk Bantuan Prihatin Nasional yang dijanjikan kepada mereka yang layak memandangkan terdapat rungutan rakyat kerana gagal mendapat bantuan tersebut.

JAWAPAN

Tuan Yang di-Pertua,

Bantuan Prihatin Nasional atau BPN merupakan bantuan kewangan yang disediakan oleh Kerajaan dalam Pakej Rangsangan Ekonomi Prihatin Rakyat (PRIHATIN) secara one-off kepada golongan B40 dan M40. Pemberian BPN bagi golongan B40 adalah berdasarkan pangkalan data Bantuan Sara Hidup, manakala BPN bagi golongan M40 pula ianya adalah berdasarkan data percukaian Lembaga Hasil Dalam Negeri Malaysia (LHDNM).

Pemohon BPN tidak perlu mengemukakan sebarang bukti pendapatan. Ini adalah kerana semua permohonan akan disemak berdasarkan data agensi yang telah ditetapkan oleh Kementerian Kewangan Malaysia.

Pembayaran BPN dibuat secara pengkreditan terus ke akaun bank penerima. Bagi penerima BPN di bawah kategori yang tidak mempunyai akaun bank atau gagal kredit ke akaun yang didaftarkan, pembayaran telah dibuat secara tunai di kaunter Bank Simpanan Nasional mulai 15 Mei 2020 sehingga 31 Disember 2020.

Permohonan baharu kepada yang tidak tersenarai sebagai penerima BPN telah dibuka bermula 1 April 2020 sehingga 30 April 2020 secara dalam talian di Portal Rasmi Bantuan Prihatin Nasional, <https://bpn.hasil.gov.my>. Hasil daripada ini, sebanyak 160,000 permohonan rayuan telah layak untuk menerima BPN.

Kerajaan telah menyediakan peruntukan sebanyak RM11.5 bilion bagi tujuan pembayaran BPN. Sehingga tarikh rayuan permohonan ditutup pada 30 April 2020, seramai 10.76 juta permohonan telah diluluskan, manakala sehingga 24 Julai 2020, sejumlah RM11.14 bilion telah disalurkan kepada 10.6 juta penerima. Pembayaran telah dibuat secara berfasa mulai 6 April 2020.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN CHAN MING KAI
[ALOR SETAR]**

TARIKH : 06 OGOS 2020 (KHAMIS)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan sehingga tahun 2019, sebanyak 7.6 juta pendaftaran perniagaan dan 22 ribu pendaftaran Perkongsian Liabiliti Terhad, berapa individu di antara mereka tidak berdaftar dengan LHDN dan berapa yang telah berdaftar serta jumlah cukai yang telah dikutip.

JAWAPAN

Tuan Yang Di-Pertua,

Untuk makluman Ahli Yang Berhormat, data yang dibangkitkan oleh YB Alor Setar ke atas bilangan pendaftaran perniagaan sebanyak 7.6 juta dan 22 ribu pendaftaran Perkongsian Liabiliti Terhad adalah berdasarkan statistik data di Suruhanjaya Syarikat Malaysia (SSM) sehingga tahun 2020.

Namun begitu, berdasarkan data Lembaga Hasil Dalam Negeri Malaysia (LHDNM) sehingga 31 Disember 2019, terdapat hanya sebanyak 4,238,807 fail pembayar cukai kategori perniagaan (milikan tunggal dan perkongsian) yang berdaftar dengan LHDNM. Bilangan fail pembayar cukai bagi kategori Perkongsian Liabiliti Terhad (PLT) pula adalah sebanyak 8,176 fail.

Pihak LHDNM tidak mempunyai data pembayar cukai yang tidak berdaftar kerana mulai tahun taksiran 2004, Kerajaan telah memperkenalkan pelaporan cukai pendapatan berdasarkan Sistem Taksiran Sendiri (STS) bagi kategori perniagaan, perkongsian dan pertubuhan merangkumi PLT. Sistem ini memindahkan tanggungjawab kepada individu dan entiti yang menerima pendapatan untuk mengira dan melaporkan pendapatan mereka kepada pihak LHDNM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN WONG SHU QI [KLUANG]

TARIKH : 6 OGOS 2020 (RABU)

SOALAN

PUAN WONG SHU QI [KLUANG] minta **MENTERI KOMUNIKASI DAN MULTIMEDIA** menyatakan sama ada Majlis Media Malaysia (MMM) mempunyai kuasa untuk ambil tindakan terhadap media yang tidak mematuhi kod etika atau prinsip kewartawanan seperti menerbitkan berita palsu.

JAWAPAN

Tan Sri Yang di-Pertua,

1. Untuk makluman Ahli Yang Berhormat, matlamat awal penubuhan Majlis Media Malaysia adalah untuk memastikan media di Malaysia mempunyai kebebasan dalam menyampaikan maklumat dan sebagai sebuah badan adjudikasi yang akan mengawal selia aduan yang diterima daripada orang awam berkaitan media.

2. Bagi menggerakkan usaha ke arah penubuhan Majlis Media Malaysia ini, satu jawatankuasa sementara (*pro-tem committee*) (dengan izin) telah ditubuhkan oleh pihak industri media pada 16 Januari 2020 dan dianggotai oleh 17 orang wakil media. Keahlian *pro-tem committee* juga telah dikembangkan semasa mesyuarat pertama *pro-tem committee* pada 30 Januari 2020 dengan beberapa tambahan wakil media bagi memastikan keterlibatan pihak-pihak yang berkepentingan. Ini menjadikan jumlah ahli *pro-tem committee* yang terkini adalah seramai 22 orang. *Pro-tem committee* ini telah dipertanggungjawabkan untuk membincangkan dan meneliti lima (5) aspek utama iaitu matlamat dan fungsi Majlis, perlembagaan dan keahliannya, kod etika, kaedah penyelesaian pertikaian dan peruntukan-peruntukan am termasuk memeriksa undang-undang sedia ada yang perlu dimansuhkan atau dipinda apabila Majlis Media Malaysia ini ditubuhkan.

3. Kementerian ini sedang meneliti laporan *pro-tem committee* berkaitan Penubuhan Majlis Media Malaysia termasuk cadangan draf Rang Undang-Undang (RUU) Majlis Media Malaysia yang telah diterima pada 3 Ogos 2020 (Isnin) lalu. Draf yang diterima adalah dalam Bahasa Inggeris dan *pro-tem committee* sedang melakukan kerja-kerja penterjemahan draf tersebut ke dalam Bahasa Melayu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN TONY PUA KIAM WEE [DAMANSARA]

TARIKH : 6 OGOS 2020 (KHAMIS)

SOALAN

Minta **MENTERI PENGAJIAN TINGGI** menyatakan dasar terkini Kerajaan terhadap bayaran balik pinjaman PTPTN, termasuk had pengecualian pembayaran balik pinjaman dan status terkini kutipan PTPTN.

JAWAPAN

Tuan Yang di-Pertua,

Pada masa kini, Kerajaan masih meneruskan dasar bayaran balik pinjaman sedia ada dan tidak membuat sebarang pindaan. Walau bagaimanapun, PTPTN sentiasa proaktif di dalam melaksanakan dasar serta polisi bagi membantu meringankan bebanan bayaran balik peminjam. Antara inisiatif terbaharu yang sedang dilaksanakan adalah:

- a. Pelaksanaan penangguhan bayaran balik pinjaman selama enam (6) bulan mulai April 2020 hingga September 2020 akibat penularan wabak COVID-19 yang melibatkan hampir **1.5 juta peminjam** dengan jumlah kutipan tertangguh sebanyak **RM750 juta**; dan
- b. Penganjuran '*Virtual Mini Job Hunt for PTPTN Borrowers*' secara dalam talian dengan kerjasama PERKESO bagi membantu peminjam mendapatkan peluang pekerjaan, seterusnya berupaya membuat bayaran balik pinjaman mereka.

Selaras dengan pengumuman YAB Perdana Menteri pada 29 Julai yang lalu mengenai pelanjutan tempoh moratorium pembayaran balik pinjaman industri bank selama tiga (3) bulan lagi kepada peminjam yang benar-benar memerlukan, kerajaan juga bersetuju untuk melanjutkan tempoh moratorium kepada peminjam PTPTN sehingga Disember 2020. Penangguhan ini akan melibatkan anggaran jumlah bayaran balik sebanyak RM375 juta. Ini bermakna jumlah keseluruhan anggaran penangguhan bayaran balik adalah sebanyak RM1.125 bilion.

Sehingga 30 Jun 2020, seramai 1,777,164 peminjam telah membuat bayaran balik dengan jumlah kutipan terkumpul sebanyak RM15.84 bilion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L
M PARAMESWARAN [BATU]**

TARIKH : 6 OGOS 2020 (KHAMIS)

SOALAN

Minta **MENTERI PENDIDIKAN** menyatakan apakah inisiatif Kementerian bagi memberdaya skil penggunaan komputer dari peringkat sekolah rendah, menengah sedangkan kebanyakan kelas komputer di sekolah tidak berfungsi dengan baik dan sistem operasi dan perisian komputer terlalu lama.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan kurikulum Teknologi Maklumat dan Komunikasi (TMK) bagi sekolah rendah dan menengah yang bertujuan mempertingkatkan kemahiran komputer dalam kalangan murid dalam mendepani cabaran teknologi pada masa akan datang. Mata pelajaran ini digubal berasaskan teknologi komputer yang sedia ada di sekolah. Namun terdapat kekangan dalam proses pengajaran dan pembelajaran mata pelajaran tersebut apabila komputer di sekolah tidak diselenggara dengan baik.

Bagi mengatasi masalah kelas komputer yang tidak berfungsi dengan baik, KPM sedang melaksanakan penyenggaraan dan penggantian peralatan ICT sekolah yang telah diadakan melalui sistem STS *Suport Ticketing System*. Jumlah kontrak penyenggaraan dan penggantian ICT sekolah bermula dari Jun 2019 hingga Mei 2021 adalah

sebanyak RM79.77juta Ini melibatkan 10,170 buah sekolah. Dalam masa yang sama, KPM juga sedang merancang perolehan baharu bagi menggantikan komputer sedia ada di Makmal Komputer Sekolah. Perancangan perolehan ini dibuat untuk tempoh lima (5) tahun secara berfasa (2021 – 2025) mengikut keupayaan kewangan KPM.

KPM juga telah memperkenalkan pelbagai inisiatif bagi mempertingkatkan kemahiran komputer dalam kalangan murid. Antara inisiatif yang dilakukan adalah seperti berikut:

- a) Pertandingan *Digital Storytelling Animation* telah diadakan dengan penyertaan sebanyak 778 buah sekolah setakat ini. Pertandingan ini mencungkil bakat murid dalam kemahiran animasi.
- b) KPM dan *Malaysia Digital Economy Corporation* (MDEC) telah berkerjasama untuk menjenamakan semula Briged Bestari dan Kelab Komputer. KPM dan MDEC telah mengeluarkan modul bagi Duta Penggerak Digital, Kelab Komputer, Kelab Robotik dan Kelab Fotografi sebagai panduan guru untuk melaksanakan aktiviti tersebut di sekolah.
- c) KPM bersama-sama Oracle akan mengadakan kursus *Learning Java using ALICE*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN TAN KOK WAI [CHERAS]

TARIKH : 6 OGOS 2020 (KHAMIS)

SOALAN

TUAN TAN KOK WAI [CHERAS] minta **MENTERI KEWANGAN** menyatakan bagaimanakah polisi tender terbuka terpakai di setiap Kementerian dan bagaimanakah polisi ini dilaksanakan. Adakah polisi rundingan terus masih dilaksanakan di mana-mana Kementerian dan jika ya, mengapa.

JAWAPAN

Tuan Yang di-Pertua

Untuk makluman Yang Berhormat,

Seperti mana amalan biasa, pelaksanaan projek Kerajaan dilaksanakan melalui kaedah tender terbuka berdasarkan peraturan dan tatacara yang termaktub di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan turut melaksanakan perolehan melalui kaedah rundingan terus secara terpilih berdasarkan kriteria khusus seperti berikut:

- i. perolehan bekalan/perkhidmatan melibatkan keperluan mendesak yang mana jika perolehan tersebut tidak dilaksanakan dengan segera, ia boleh memudaratkan dan menjejaskan perkhidmatan serta kepentingan Negara;

- ii. keperluan penyeragaman bagi memastikan kesesuaian penggunaan (*compatibility*) antara barangan sedia ada dengan barangan baru yang akan diperoleh;
- iii. satu punca bekalan/perkhidmatan iaitu pengeluaran produk atau penyediaan perkhidmatan hanya boleh dibekalkan daripada satu sumber sahaja;
- iv. keselamatan/strategik yang melibatkan perolehan item atau perkhidmatan demi keselamatan atau kepentingan strategik negara; atau
- v. kontrak dengan syarikat pembuat (*manufacturer*) Bumiputera yang memenuhi semua syarat kelayakan.

Kementerian perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan bagi mendapatkan kelulusan sebelum perolehan boleh dilaksanakan sebagai langkah kawalan.

Selain itu, bagi meningkatkan lagi aktiviti ekonomi melalui Pakej Rangsangan Ekonomi 2020, Kerajaan telah menaikkan had nilai ambang sedia ada bagi pelaksanaan perolehan projek Kerajaan secara undian dan sebut harga serta dijangka akan memberi manfaat terutamanya kepada lebih 88,000 kontraktor di Gred G1, G2 dan G3.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN] - BERSATU**

TARIKH : 6 OGOS 2020 (KHAMIS)

SOALAN

Minta **MENTERI PENDIDIKAN** menyatakan perancangan untuk Kementerian membina bangunan asrama di SMK Libaran demi kesejahteraan pelajar di sekolah itu.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia melalui Jabatan Pendidikan Negeri (JPN) Sabah telah mengemukakan cadangan projek pembinaan asrama baharu bagi SMK Libaran di Sandakan dalam *Rolling Plan* Pertama, Rancangan Malaysia Kedua Belas (RMKe12). Walau bagaimanapun, kelulusan projek ini adalah bergantung kepada keputusan agensi pusat dan kedudukan kewangan kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN TEH KOK LIM [TAIPING]

TARIKH : 6 OGOS 2020 (KHAMIS)

SOALAN

YB. TUAN TEH KOK LIM [TAIPING] minta **MENTERI PELANCONGAN, SENI DAN BUDAYA** menyatakan jumlah peruntukan yang telah diperuntukan dalam usaha mempromosikan pelancongan tempatan pada tahun ini.

JAWAPAN

Tuan Yang di-Pertua,

Kementerian Pelancongan, Seni dan Budaya sentiasa berusaha untuk menggalakkan pelancongan domestik kerana sektor ini merupakan salah satu sektor yang penting dalam menyumbangkan kepada pertumbuhan ekonomi Malaysia terutamanya bagi tempoh pasca COVID-19 ini.

Untuk makluman Ahli Yang Berhormat, bajet yang diperuntukkan untuk kempen VM2020 adalah sejumlah RM90 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 6 OGOS 2020 (KHAMIS)

SOALAN

Minta **MENTERI PENGANGKUTAN** menyatakan jumlah penumpang ETS dari Taiping ke Kuala Lumpur dan rancangan untuk meningkat tahap perkhidmatan perjalanan ETS dari Taiping ke Kuala Lumpur dan sebaliknya.

JAWAPAN

Yang di-Pertua,

1. Untuk makluman Yang Berhormat, sebanyak 24 perkhidmatan ETS sehari beroperasi di Stesen Taiping. Berdasarkan statistik penumpang ETS tahun 2019, sebanyak 93,212 penumpang telah membuat perjalanan daripada stesen Taiping ke stesen Kuala Lumpur, dan sebanyak 90,182 penumpang membuat perjalanan dari Kuala Lumpur ke Taiping.
2. Selain itu, bagi meningkatkan lagi tahap perkhidmatan ETS, pada tahun 2016, Kerajaan telah meluluskan pembelian 9 set tren ETS (*Electric Train Set*) baru daripada China dengan kos sebanyak RM470.8 juta. Dengan pentauliahan secara berperingkat tren ETS baru ini, bermula Oktober 2019, KTMB telah memperkenalkan Koc Kelas Perniagaan yang mempunyai penambahbaikan dari segi kemudahan dan keselesaan kepada pengguna.
3. Pihak KTMB juga merancang untuk menambahkan lagi bilangan Perkhidmatan ETS antara Kuala Lumpur dan Taiping secara berperingkat daripada 24 perkhidmatan kepada 28 perkhidmatan sehari selaras dengan pengoperasian 9 set ETS baru yang dijangka akan diterima sepenuhnya pada penghujung tahun 2020.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SERI TIONG KING SING
[BINTULU]**

TARIKH : 6 OGOS 2020 (KHAMIS)

SOALAN

YB DATO' SERI TIONG KING SING [BINTULU] minta **MENTERI KOMUNIKASI DAN MULTIMEDIA** menyatakan :

- a) apakah langkah-langkah yang berkesan untuk mengatasi masalah rangkaian dalam talian jalur lebar dan telefon di kawasan luar bandar; dan
- b) apakah pendekatan Kerajaan dalam menangani isu penggunaan telefon pintar dan internet di kalangan remaja yang selalu menimbulkan isu-isu viral seperti penyebaran berita palsu di media sosial.

JAWAPAN

Tuan Yang di-Pertua,

(a)

1. Untuk makluman Ahli Yang Berhormat, Pihak Kementerian melalui Suruhanjaya Komunikasi dan Multimedia Malaysia ("SKMM") sentiasa memberi tumpuan kepada pembangunan infrastruktur komunikasi melalui penyediaan liputan jalur lebar talian tetap dan mudah alih dengan menggunakan pelbagai teknologi di seluruh negara terutama di kawasan luar bandar.

2. Untuk melaksanakan inisiatif-inisiatif bagi penyediaan perkhidmatan jalur lebar di kawasan-kawasan luar bandar yang tidak mempunyai prasarana seperti grid bekalan kuasa elektrik, kemudahan jalan raya serta bentuk muka bumi yang berbukit-bukau dan berhutan tebal, pihak pemberi perkhidmatan perlu mengkaji teknologi yang bersesuaian serta sumber bekalan elektrik alternatif yang mencukupi, terjamin dan berdaya harap di samping mengatasi kesukaran untuk melaksanakan kerja-kerja penyelenggaraan.

3. Walau bagaimanapun, usaha bagi meningkatkan liputan dan kualiti perkhidmatan jalur lebar di seluruh negara terutamanya di kawasan luar bandar dan pedalaman bukan sahaja melibatkan kerajaan persekutuan malah memerlukan kerjasama pelbagai pihak, termasuk di peringkat kerajaan negeri dan pihak berkuasa tempatan untuk pemudahcaraan proses-proses perolehan dan kelulusan tapak yang terlibat.

4. Selanjutnya, Suruhanjaya Komunikasi dan Multimedia Malaysia (SKMM) akan terus bekerjasama dengan agensi kerajaan negeri iaitu Sarawak Multimedia Authority (SMA) bagi menambahbaik liputan dan kualiti jalur lebar di Sarawak. Semasa sesi kunjung hormat saya kepada YAB Ketua Menteri Sarawak pada 10 Julai yang lalu, beberapa persetujuan penting telah dicapai antara lain adalah mengeratkan kerjasama bersama pihak SMA dari segi perancangan dan

memudahcara proses kelulusan pembinaan untuk mempercepat pembinaan infrastruktur digital.

5. Pada masa yang sama, Kementerian dan SKMM juga sedang mengadakan sesi perancangan bersama pihak industri dan pelbagai agensi Kerajaan untuk memantapkan kualiti dan liputan perkhidmatan jalur lebar.

(b)

1. Pada zaman teknologi termaju dan kewujudan platform digital serba canggih telah membentuk cara komunikasi baharu dan jangkauan global. Pihak Kerajaan sedar bahawa kebergantungan semua pihak termasuk orang awam dalam penggunaan Internet untuk operasi harian dan komunikasi memberi pendedahan kepada ancaman dan serangan siber malahan kita turut mengalami masalah baharu iaitu penyebaran maklumat tidak tepat dan penularan berita palsu. Ini adalah masalah serius yang berisiko menggugat keamanan dan keselamatan negara serta menimbulkan suasana ketidaktenteraman di kalangan rakyat.

2. Justeru, Kerajaan mengambil langkah yang proaktif dan bersepadu untuk menangani trend ancaman siber masa kini yang merangkumi aspek proses, manusia dan teknologi.

3. Kaedah terbaik dalam memerangi maklumat berita palsu adalah 'membanjiri' ruang maklumat dengan berita benar. Sehubungan dengan itu, pihak Kementerian dan Suruhanjaya Komunikasi dan Multimedia Malaysia (SKMM) akan meneruskan inisiatif kesedaran serta keupayaan dan pendidikan pengguna atau "user empowerment and education" melalui pelbagai program advokasi dan kesedaran di media dan di lapangan sebagai kesinambungan kepada inisiatif sedia ada dalam usaha memupuk kesedaran awam mengenai gejala berita palsu, membudayakan amalan menyemak dan menentukan kesahihan sesuatu berita sebelum dikongsi atau disebarkan, serta membudayakan amalan menyebarkan kebenaran.

4. Naratif yang akan digunakan ialah dengan bercerita secara konsisten, dengan matlamat akhir supaya orang akan dapat

membezakan yang benar dengan yang tidak benar, dan yang sah dan tidak sah.

5. Pada masa yang sama, kolaborasi dan kerjasama baik yang telah sedia terjalin dengan penyedia platform media sosial seperti *Facebook*, *Google* dan *Twitter* akan terus diperkukuh dan diperkasakan terutamanya dalam usaha menurun atau memadamkan kandungan yang menyalahi undang-undang Malaysia, selaras dengan norma-norma serta nilai budaya negara. Ini selari dengan terma perkhidmatan serta piawaian komuniti pihak penyedia platform-platform berkenaan yang berpangkalan di luar negara.

6. Selain itu, peruntukan undang-undang sedia ada seperti Kanun Keseksaan (Akta 574) dan Akta Komunikasi dan Multimedia 1998 (Akta 588) adalah antara instrumen perundangan yang tergunapakai di dalam mengawal perekaan, penerbitan dan penularan kandungan atau berita tidak benar pada ketika ini. Tindakan adalah berdasarkan maklumat serta laporan atau aduan awam.

7. “Jawatankuasa Jenayah Siber” yang telah ditubuhkan antara PDRM dan SKMM juga akan terus digerakkan dan diperkasakan bagi menerajui gerak kerja dan tindakan yang lebih strategik dan tersusun, termasuklah bagi perkara yang melibatkan isu kesalahan jenayah siber termasuklah berkaitan penyebaran kandungan, maklumat, berita atau laporan tidak benar atau palsu.

8. CyberSecurity Malaysia juga telah melaksanakan program CyberSAFE (Cyber Security Awareness for Everyone). Antara program serta aktiviti yang dijalankan adalah seperti berikut:

- a. Ceramah Kesedaran Keselamatan Siber (Cyber Security Awareness Talks - CSAT)

Program ini bertujuan menyampaikan maklumat mengenai kepentingan keselamatan siber dan penggunaan teknologi secara positif kepada semua kumpulan sasaran (pengguna Internet). Statistik jangkauan CSAT adalah seperti berikut:

Tahun	Jumlah Jangkauan
2020 (sehingga Mei)	24, 975
2019	23, 060
2018	20, 950

b. Modul Kesedaran Keselamatan Siber Nasional (MKKSN) dibangunkan dengan sokongan Kementerian Pelajaran Malaysia bagi meningkatkan tahap kesedaran keselamatan siber dalam kalangan murid dan guru.

c. Pertandingan Wacana Keselamatan ICT Kebangsaan

Program berkonsepkan wacana ini dilaksanakan kepada sekolah-sekolah menengah di seluruh Malaysia dengan kerjasama KPM semenjak tahun 2013.

d. Kempen kesedaran keselamatan siber melalui 'Safer Internet Day' (SID)

Diterajui oleh CyberSecurity Malaysia, sambutan 'Safer Internet Day' Edisi Malaysia mula diadakan pada tahun 2010. Pada tahun ini, CyberSecurity Malaysia telah menganjurkan Forum "Memupuk Fasih Digital Dalam Abad Ke-21" sempena Sambutan Hari Keselamatan Internet (Safer Internet Day - SID) 2020 – Edisi Malaysia dan Pelancaran Buku Panduan "Mendidik Anak-Anak Digital".

e. Sementara itu, CyberSecurity Malaysia turut menerbitkan mesej-mesej mengenai tips penggunaan Internet dalam bentuk infografik, video grafik serta klip video melalui platform media sosial iaitu Instagram, Facebook, Youtube dan LinkedIn yang merangkumi isu seperti Scam & Phishing, Tips Keibubapaan Siber, Pelaporan Insiden ke Cyber999, Pembelian Dalam Talian, Tips Remaja, Perlindungan Kata Laluan, Berita Palsu, Tips Kanak-Kanak, Anti-virus, Panduan Persidangan Dalam Talian, Tips Bekerja dari

SOALAN NO : 44

Rumah, Ucapan khas kepada barisan hadapan COVID-19, Perbankan Internet, Permainan Dalam Talian, Peraturan 20-20-20, Kandungan Yang Tidak Sesuai, Hendap Siber, Antun Siber, Buli Siber, Ketirisan Data, Sexting, Detoks Digital, Penggodaman serta beberapa klip video yang dilaksanakan dengan kerjasama rakan strategik CyberSAFE mengenai remaja dan kanak-kanak di alam siber.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DATUK MOHD AZIS BIN JAMMAN
[SEPANGGAR]**

TARIKH : 6 OGOS 2020 (KHAMIS)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan apakah perancangan strategik dalam menggerakkan kembali ekonomi negara pada Pasca COVID-19.

JAWAPAN

Tuan Yang di-Pertua,

1. Penularan pandemik COVID-19 dalam suasana ketidaktentuan ekonomi dan perdagangan dunia beserta harga komoditi yang rendah telah memberi kesan yang amat ketara kepada pertumbuhan ekonomi negara. Oleh itu, keluaran dalam negeri kasar (KDNK) telah berkembang perlahan sebanyak 0.7 peratus dalam tempoh suku pertama 2020. Berdasarkan petunjuk ekonomi terkini, pertumbuhan ekonomi pada suku kedua 2020 dijangka mencatat pertumbuhan negatif. Semua sektor utama ekonomi telah terjejas akibat penularan wabak ini. Di samping itu, sekatan perjalanan merentas sempadan oleh kebanyakan negara juga telah menjejaskan ketibaan pelancong sekaligus memberi kesan kepada sektor pelancongan terutamanya industri perhotelan, penerbangan serta perdagangan borong dan runcit.

2. Dalam usaha untuk memulihkan ekonomi negara yang terjejas kesan daripada pandemik COVID-19 ini, Kerajaan telah membuat perancangan berdasarkan enam peringkat iaitu:

- a. Ketegasan (*Resolve*);
- b. Ketahanan (*Resilience*);
- c. Memulakan Semula (*Restart*);
- d. Pemulihan (*Recovery*);
- e. Memperkasa (*Revitalise*) dan;
- f. Menyusun Semula (*Reform*).

3. Kita telah melepasi 3 peringkat. Peringkat pertama “ketegasan” telah melibatkan pelaksanaan Perintah Kawalan Pergerakan (PKP) dan peringkat kedua “ketahanan” tertumpu kepada penyediaan bantuan segera untuk meringankan beban yang ditanggung oleh isi rumah dan golongan peniaga melalui pakej rangsangan ekonomi PRIHATIN. Sementara dalam peringkat ketiga “memulakan semula”, sektor-sektor ekonomi telah dibuka semula mengikut Prosedur Operasi Standard (SOP) yang ditetapkan. Kini, kita berada dalam peringkat keempat “pemulihan” dengan pelaksanaan Pelan Jana Semula Ekonomi

(PENJANA) yang merupakan pelan jangka pendek bagi merangsang aktiviti ekonomi domestik. Pelaksanaan pakej rangsangan ekonomi dan penubuhan Unit Pelaksanaan dan Koordinasi Stimulus Ekonomi Antara Agensi Nasional (LAKSANA) akan memastikan inisiatif di bawah PENJANA dan PRIHATIN mencapai sasaran dengan cara yang telus.

Tuan Yang di-Pertua,

4. Selagi vaksin COVID-19 belum dijumpai dan digunapakai sepenuhnya oleh masyarakat dunia, kita belum pasti bila pandemik ini akan benar-benar berakhir. Namun, Kerajaan akan meneruskan perancangan strategiknya bagi memastikan ekonomi bersedia dan berdaya tahan dalam norma baharu. Sejurus itu, Belanjawan 2021 yang akan dibentangkan pada bulan November kelak akan melaksanakan pelbagai inisiatif untuk terus meningkatkan kualiti hidup rakyat, merancakkan ekonomi, memastikan pembangunan yang mampan dan menambah baik penyampaian perkhidmatan awam. Dalam peringkat terakhir, “menyusun semula”, Rancangan Malaysia Keduabelas, 2021-2025 (RMKe-12) akan dibentangkan dalam suku pertama 2021, iaitu fasa pertama pelaksanaan Dasar Kemakmuran Bersama bagi memastikan pertumbuhan jangka panjang yang berkualiti, inklusif dan mampan.

5. Kesemua strategi yang sedang dan akan digubal bertumpu kepada isu dan cabaran untuk memacu semula aktiviti ekonomi dengan mengambil kira landskap baharu ekonomi dan persekitaran dunia pasca COVID-19. Sehubungan itu, Kerajaan yakin ekonomi Malaysia akan kembali pulih sejajar dengan peningkatan unjuran pertumbuhan global.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 6 OGOS 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan:

- (a) rancangan Kementerian memberi status Taman Negeri kepada Ulu Muda demi memelihara sumber air 4.09 juta penduduk Zon Utara daripada impak pembalakan tidak terkawal; dan
- (b) inisiatif Kementerian membantu implikasi yang terpaksa dihadapi oleh Kerajaan negeri seperti bayaran ganti rugi.

JAWAPAN

Tuan Yang di-Pertua,

1. Perkara 74 (2) Perlembagaan Persekutuan telah memperuntukkan bahawa perkara-perkara berkaitan tanah dan hutan adalah di bawah bidang kuasa Kerajaan Negeri. Kuasa eksekutif Kerajaan Persekutuan hanya terhad untuk memberi khidmat nasihat dan bantuan teknikal, latihan serta menjalankan penyelidikan berkaitan perhutanan.
2. Untuk makluman Ahli-ahli Yang Berhormat, luas keseluruhan kawasan Hutan Simpan Ulu Muda ialah 106,418 hektar dan telah diwartakan sebagai Hutan Simpanan Kekal (HSK) di bawah Seksyen 7 Akta Perhutanan Negara 1984 [Akta 313] oleh Pihak Berkuasa Negeri Kedah pada tahun 1932 dan bakinya pada tahun 2013 melalui Warta Kerajaan Negeri Kedah Darul Aman no.380 bertarikh 24 September 1932 dan Warta Kerajaan Negeri Kedah Darul Aman no.1342 bertarikh 17 Januari 2013.
3. Daripada jumlah tersebut seluas 16,229 hektar telah diwartakan sebagai Hutan Tadahan Air (Warta Kerajaan Negeri Kedah Darul Aman no.127 bertarikh 13 Mac 2008 dan Warta Kerajaan Negeri Kedah Darul Aman no.341 bertarikh 10 Mei 2018) manakala seluas 11,118 hektar telah diwartakan sebagai Hutan Taman Negeri (Warta Kerajaan Negeri Kedah Darul Aman no. 341 bertarikh 10 Mei 2018) di bawah Seksyen 10 (1) dalam akta yang sama.
4. Bagi membantu Kerajaan Negeri melindungi dan menguruskan kawasan Ulu Muda, permohonan peruntukan di bawah Rancangan Malaysia Kedua Belas (RMKe-12) telah dikemukakan untuk pertimbangan Unit Perancang Ekonomi, Jabatan Perdana Menteri yang akan melibatkan perancangan dan pelaksanaan aktiviti seperti berikut:
 - (i) penyediaan pelan tindakan pengurusan Taman Negeri Ulu Muda;
 - (ii) pembangunan infrastruktur yang berkaitan; dan
 - (iii) pembangunan modal insan serta peningkatan kesedaran masyarakat.

5. Kerajaan Persekutuan juga telah menyalurkan peruntukan sebanyak RM5.83 juta di bawah *Ecological Fiscal Transfer for Biodiversity Conservation* (EFT) kepada negeri Kedah di bawah Bajet 2019. Peruntukan ini disalurkan bagi membiayai kadar baharu Pemberian Berdasarkan Tahap Pembangunan Ekonomi, Infrastruktur dan Kesejahteraan Hidup (TAHAP) untuk melindungi kawasan perlindungan hutan dan marin serta membantu Negeri-Negeri yang berpendapatan rendah melaksanakan program/projek bagi meningkatkan hasil negeri, sebagaimana yang dipersetujui oleh Majlis Kewangan Negara yang telah bersidang pada 27 Mei 2019. Pengagihan peruntukan kepada Kerajaan Negeri telah dilaksanakan oleh Kementerian Kewangan mulai Mei 2019 secara *one-off*.

6. Selain itu, Kementerian buat masa ini sedang mengenal pasti mekanisme yang sesuai bagi menjana pendapatan melalui potensi baharu selain daripada kayu balak termasuk inisiatif REDD Plus dan bayaran bagi perkhidmatan ekosistem (*Payment for Ecosystem Services* – PES) untuk mengurangkan kebergantungan kepada aktiviti pembalakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN CHAN FOONG HIN
[KOTA KINABALU]**

TARIKH : 6 OGOS 2020 (KHAMIS)

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan apakah justifikasi pelantikan ahli pengarah badan berkanun dan GLC yang bersifat politik secara meleluasa di bawah pemerintahan PN. Senaraikan nama-nama lantikan daripada ahli-ahli parti politik dan skim gaji mereka.

JAWAPAN

Tuan Yang di-Pertua,

Untuk makluman Yang Berhormat, ahli politik dalam syarikat-syarikat Menteri Kewangan (Diperbadankan) [MKD] adalah dilantik berdasarkan kepada kemampuan serta kepakaran masing-masing dan mengambil kira keperluan syarikat itu sendiri bagi membolehkan Lembaga Pengarah syarikat berkenaan beroperasi pada tahap yang optimum. Pelantikan Lembaga Pengarah syarikat MKD disuaipadankan berdasarkan keperluan setiap syarikat MKD dengan mengambil kira latar belakang dan kebolehan seseorang individu daripada pelbagai sudut bagi menganggotai Lembaga Pengarah syarikat MKD.

Justeru itu, ahli politik yang berkeelayakan atau memenuhi kriteria *fit and proper* sahaja yang dilantik untuk menganggotai Lembaga Pengarah syarikat-syarikat MKD. Ini adalah salah satu cara untuk meningkatkan keupayaan barisan kepimpinan Ahli Lembaga Pengarah (ALP) syarikat MKD dengan memperluaskan serta mempelbagaikan lagi komposisi ahli-ahlinya daripada segi kemampuan, kepakaran dan pengalaman. Pengalaman sama ada dalam bidang operasi, teknikal, profesional atau pendedahan spesifik kepada sektor berkaitan adalah penting bagi memastikan *the right person with the right skills* (dengan izin) dipilih bagi memantapkan struktur Lembaga Pengarah syarikat. Di samping itu, penekanan juga akan diberikan kepada nilai personaliti individu dengan mengambil kira aspek-aspek integriti dan kebertanggungjawaban dalam melaksanakan amanah yang diberikan.

Pelantikan Ahli Politik adalah sebagai Pengerusi Bukan Eksekutif dan Pengarah Bebas Bukan Eksekutif yang mana akan membataskan kuasa di antara Lembaga Pengarah dan Pengurusan selaras dengan MCCG 2017 dan sebagai mekanisma semak dan imbang (*check and balance*) agar selari dengan dasar dan aspirasi Kerajaan. Lantikan politik dijangka dapat mengimbangi kehendak korporat yang lebih cenderung berorientasikan keuntungan di samping memenuhi ekspektasi rakyat.

Sehingga Julai 2020, seramai 15 orang ahli politik telah dilantik sebagai Pengerusi dan Ahli Lembaga Pengarah syarikat-syarikat Menteri Kewangan (Diperbadankan) [MKD]. Manakala bagi 15 Badan Berkanun Persekutuan (BBP) di bawah seliaan Kementerian Kewangan, hanya dua (2) lantikan politik telah dibuat. Senarai penuh ahli politik tersebut adalah seperti berikut:

Syarikat-Syarikat Menteri Kewangan (Diperbadankan) [MKD]

Bil.	Nama	Bil.	Jawatan Dalam Lembaga	Syarikat
1.	YAB Tan Sri Muhyiddin bin Mohd Yassin	1.	Pengerusi Bukan Eksekutif	Khazanah Nasional Berhad
		2.	Pengerusi Bukan Eksekutif	Yayasan Pelaburan Bumiputera
2.	YB ACP (B) Tuan Ramli bin Dato' Mohd Nor	3.	Pengerusi Bukan Eksekutif	Amanah Raya Berhad
3.	YB Dato' Hasbullah bin Osman	4.	Pengerusi Bukan Eksekutif	Syarikat Perumahan Negara Berhad
4.	YB Dato' Jalaluddin bin Alias	5.	Pengerusi Bukan Eksekutif	UDA Holdings Berhad
5.	YB Dato' Seri Diraja Mahdzir bin Khalid	6.	Pengerusi Bukan Eksekutif	Tenaga Nasional Berhad
6.	YB Dato' Seri Mohamed Azmin bin Ali	7.	Pengarah Bukan Bebas Bukan Eksekutif	Khazanah Nasional Berhad
7.		8.	Pemegang Amanah	Yayasan Amanah Hartanah Bumiputera

NO SOALAN : 47

8.	YB Dato' Sri Hassan bin Arifin	9.	Pengerusi Bukan Eksekutif	Pengurusan Aset Air Berhad
9.	YB Dato' Sri Hjh Rohani binti Abdul Karim	10.	Pengerusi Bukan Eksekutif	Padiberas Nasional Berhad
10.	YB Dato Sri Tajuddin bin Abdul Rahman	11.	Pengerusi Bukan Eksekutif	Prasarana Malaysia Berhad
11.	YB Datuk Musa bin Sheikh Fadzir	12.	Pengerusi Bukan Eksekutif	JKP Sdn Bhd
12.	YB Datuk Zakaria bin Mohd Edris @ Tubau	13.	Pengerusi Bukan Eksekutif	Perbadanan Nasional Berhad
13.	YB Tuan Haji Ahmad Johnie bin Haji Zawawi	14.	Pengerusi Bukan Eksekutif	Indah Water Konsortium Sdn Bhd
14.	Tuan Mohamad bin Husain	15.	Pengarah Bebas Bukan Eksekutif	FELCRA Berhad
15.	YB Ustaz Sabri bin Hj Azit	16.	Pengerusi Bukan Eksekutif	Institut Terjemahan & Buku Malaysia Berhad
16.	YB Tan Sri Noh bin Hj Omar	17.	Pengerusi Bukan Eksekutif	Perbadanan Usahawan Nasional Berhad

Badan Berkanun Persekutuan Di Bawah Kementerian Kewangan

Bil.	Nama	Bil.	Jawatan Dalam Lembaga	Badan Berkanun
1.	YAB Tuan Haji Muhammad Sanusi bin Md Nor	1.	Pengerusi Bersama Jemaah Pengarah	Lembaga Pembangunan Langkawi (LADA)
2.	YB Tuan Juhari bin Bulat			

Secara prinsipnya, kadar elaun dan insentif yang layak bagi Pengerusi syarikat MKD adalah berbeza-beza mengikut kemampuan kewangan syarikat masing-masing. Jumlah imbuhan dan ganjaran yang dibayar boleh diperolehi daripada penyata kewangan beraudit syarikat yang dikemukakan kepada Suruhanjaya Syarikat Malaysia (SSM). Manakala bagi Badan Berkanun Persekutuan, kadar elaun tertakluk kepada perakuan Lembaga Pengarah BBP masing-masing dan kelulusan Menteri Pengawal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. PROF MADYA DR. RUSNAH BINTI ALUAI
[TANGGA BATU]**

TARIKH : 6 OGOS 2020 (KHAMIS)

SOALAN

PROF MADYA DR. RUSNAH BINTI ALUAI [TANGGA BATU] minta **MENTERI KEWANGAN** menyatakan apakah kayu ukur yang diguna pakai kepada Ahli-ahli Parlimen penyokong Kerajaan yang dipilih mengetuai syarikat berkaitan Kerajaan (GLC) berbanding bekas pengerusi-pengerusi GLC yang dipilih pada masa Kerajaan Pakatan Harapan.

JAWAPAN

Tuan Yang di-Pertua,

Untuk makluman Yang Berhormat, secara amnya, pencalonan dan pelantikan Ahli Lembaga Pengarah (ALP) termasuk Pengerusi bagi syarikat-syarikat milik Menteri Kewangan Diperbadankan (MKD) dibuat berdasarkan kesesuaian dari segi kelayakan, pengalaman dan kepakaran seseorang individu. Bagi pelantikan Pengerusi dan ALP syarikat-syarikat berkaitan Kerajaan (GLC), garis panduan di dalam Buku Hijau berkaitan Meningkatkan Keberkesanan Lembaga Pengarah (2006) telah menggariskan beberapa kriteria untuk melantik individu yang benar-benar berwibawa dan berkebolehan untuk menerajui Lembaga Pengarah syarikat.

Kriteria minimum bagi pelantikan seseorang calon ALP adalah sekurang-kurangnya mempunyai Ijazah Sarjana Muda atau kelayakan akademik dan profesional lain yang setara, mempunyai pengalaman berkhidmat dalam industri atau bidang berkaitan seperti perakaunan, kewangan atau perundangan atau kepakaran yang bersesuaian dalam industri berkaitan yang boleh dimanfaatkan oleh syarikat dan industri.

Selain itu, pelantikan ALP juga dilihat dari sudut kepelbagaian latar belakang dan kepakaran yang bersesuaian (*fit and proper requirements*) bagi memastikan komposisi Lembaga Pengarah yang mantap di samping menggalakkan pelaksanaan polisi keterangkuman (*inclusiveness*) dan kepelbagaian (*diversity*) di bawah *Malaysian Code of Corporate Governance* (MCCG) 2017. Bagi syarikat MKD yang tersenarai di Bursa Malaysia, pencalonan seseorang individu sebagai Pengerusi atau ALP syarikat akan melalui pertimbangan Jawatankuasa Pencalonan dan Imbuhan (*Nomination and Remuneration Committee - NRC*) serta Lembaga Pengarah syarikat masing-masing. Setelah ianya diluluskan oleh NRC dan Lembaga Pengarah barulah calon tersebut dikemukakan untuk tapisan Suruhanjaya Sekuriti dan seterusnya dikemukakan kepada Bursa Malaysia untuk pengumuman. Manakala bagi syarikat MKD yang tidak

tersenarai di Bursa Malaysia, pencalonan seseorang individu sebagai Pengerusi atau ALP syarikat akan melalui pertimbangan NRC serta Lembaga Pengarah syarikat masing-masing.

Di samping itu juga, selaras dengan Akta Syarikat 2016, secara umumnya setiap calon ALP bagi semua syarikat MKD perlu melalui beberapa tapisan iaitu tapisan keutuhan yang dijalankan oleh pihak Suruhanjaya Pencegahan Rasuah Malaysia (SPRM), semakan kebangkrupan oleh Jabatan Insolvensi Malaysia (JIM) dan semakan tindakan undang-undang oleh Pejabat Ketua Pendaftar Mahkamah Persekutuan (PKPMP) sebagai prosedur (*requirement*) sebelum dilantik. Tapisan tersebut merupakan penambahbaikan yang telah dilaksanakan semenjak Akta Syarikat 1965 dipinda, digubal dan diluluskan oleh Parlimen sebagai Akta Syarikat 2016, sebagai sebahagian daripada usaha memperkemaskan tadbir urus pelantikan Pengerusi dan ALP syarikat.

Lantikan politik dalam Lembaga Pengarah syarikat adalah sebagai Pengarah Bukan Eksekutif selaras dengan MCCG 2017 yang mana terdapat pembatasan kuasa di antara Lembaga Pengarah dan Pengurusan sebagai mekanisma semak dan imbang (*check and balance*). Selain daripada itu, dengan adanya lantikan politik diharapkan dapat mempelbagaikan komposisi Lembaga Pengarah dan memberi dukungan serta menyumbang idea-idea yang baik untuk meneraju syarikat melaksanakan aspirasi Kerajaan dalam memajukan negara dan ekonomi rakyat.

Kesimpulannya, pelantikan ALP syarikat MKD disuaipadankan berdasarkan keperluan setiap syarikat MKD dengan mengambil kira latar belakang dan kebolehan seseorang individu daripada pelbagai sudut bagi menganggotai Lembaga Pengarah syarikat MKD. Justeru itu, hanya Ahli Parlimen yang berkeelayakan atau memenuhi kriteria *fit and proper* sahaja yang dilantik untuk menerajui Lembaga Pengarah syarikat-syarikat MKD.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DATUK SERI SAIFUDDIN NASUTION
BIN ISMAIL [KULIM-BANDAR BHARU]**

TARIKH : 06 OGOS 2020 (KHAMIS)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan senarai terkini nama-nama Ahli Parlimen yang dilantik sebagai pengerusi GLC dan jumlah elaun atau terimaan dan kemudahan-kemudahan yang setiap mereka peroleh.

JAWAPAN

Tuan Yang di-Pertua,

Untuk makluman Yang Berhormat, sehingga Julai 2020, seramai 12 orang Ahli Parlimen telah dilantik sebagai Pengerusi syarikat-syarikat Menteri Kewangan (Diperbadankan) [MKD]. Senarai penuh Ahli Parlimen tersebut adalah seperti berikut:-

Bil.	Nama	Bil.	Jawatan Dalam Lembaga	Syarikat
1.	YAB Tan Sri Muhyiddin bin Mohd Yassin	1.	Pengerusi Bukan Eksekutif	Khazanah Nasional Berhad
		2.	Pengerusi Bukan Eksekutif	Yayasan Pelaburan Bumiputera
2.	YB ACP (B) Tuan Ramli bin Dato' Mohd Nor	3.	Pengerusi Bukan Eksekutif	Amanah Raya Berhad
3.	YB Dato' Hasbullah bin Osman	4.	Pengerusi Bukan Eksekutif	Syarikat Perumahan Negara Berhad
4.	YB Dato' Jalaluddin bin Alias	5.	Pengerusi Bukan Eksekutif	UDA Holdings Berhad
5.	YB Dato' Seri Diraja Mahdzir bin Khalid	6.	Pengerusi Bukan Eksekutif	Tenaga Nasional Berhad
6.	YB Dato' Sri Hassan bin Arifin	7.	Pengerusi Bukan Eksekutif	Pengurusan Aset Air Berhad
7.	YB Dato' Sri Hj Rohani binti Abdul Karim	8.	Pengerusi Bukan Eksekutif	Padiberas Nasional Berhad
8.	YB Dato Sri Tajuddin bin Abdul Rahman	9.	Pengerusi Bukan Eksekutif	Prasarana Malaysia Berhad
9.	YB Datuk Musa bin Sheikh Fadzir	10.	Pengerusi Bukan Eksekutif	JKP Sdn Bhd
10.	YB Datuk Zakaria bin Mohd Edris @ Tubau	11.	Pengerusi Bukan Eksekutif	Perbadanan Nasional Berhad
11.	YB Tuan Haji Ahmad Johnie bin Haji Zawawi	12.	Pengerusi Bukan Eksekutif	Indah Water Konsortium Sdn Bhd
12.	YB Ustaz Sabri bin Hj Azit	13.	Pengerusi Bukan Eksekutif	Institut Terjemahan & Buku Malaysia Berhad

Kriteria pencalonan dan pelantikan Pengerusi bagi syarikat-syarikat milik Menteri Kewangan (Diperbadankan) [MKD] dibuat berdasarkan kesesuaian dari segi kelayakan, pengalaman dan kepakaran seseorang individu.

Secara prinsipnya, kadar elaun dan insentif yang layak bagi Pengerusi syarikat MKD seperti kemudahan insurans perubatan dan elaun telefon bimbit adalah berbeza-beza mengikut kemampuan kewangan syarikat masing-masing. Butiran lanjut berkaitan imbuhan seperti elaun bulanan boleh diperolehi daripada penyata kewangan beraudit syarikat yang dikemukakan kepada Suruhanjaya Syarikat Malaysia (SSM).

Sekian, terima kasih.